

Älənžil n-Ÿisa Älmasex wa iktäb Marqəs

*Ämašal wa dd-ässawäđ Exya wa n-Enəsselmäx
(Mätti 3:1-12; Luqa 3:1-17; Exya 1:19-23)*

¹ Sänto n-Älənžil n-ŸisaÄlmasex wa n-Rure-s n-Mässinäx da:

² Enta-en-däx a fäll-innä ännäbi Saya† däx-өлкөттәб-нет:

«Әnhөy! Äzizäräx-ak, inna Mässinäx, änämmašul-in wa he-iknən tabarät-näk.

³ Änämmašul-en, äsexärät däx-tenere, ijanna:

«Äknät tabarät n-Mässinäx, səssiğədät ibaran-net.» »

⁴ Emmək-wen-däx a-s dd-osä Exya wa n-Enəsselmäx, ıxaṭṭäb, ijanna i-äddinät: «Utabät, tətwəsəlmäxäm däx-aman i-ad-təjrəwäm tenäšše n-ibäkkäđän.»

⁵ İjanna a-wen-däx, ad-sär-s dd-zajjārän äddinät äjjootnen dd-falnen teje ta n-Älyähudəyät d-ağrəm wa n-Yärussälam, safäkkarän-dd a-wa ämešälän däx-ibäkkäđän dat-tamötte, isalmağ-tän däx-aman n-ejäns wa s-itawänna Үрдөni.

† **1:2 1:2** A-wa ännäbi dd-äzzarän i-Ÿisa, äloläy däx-isälan-net əssayät timäđ n-awätay dat-tiwit-net.

⁶ Ils' Exya emäls iknan s-eläm n-amnəs warän amžadän, ijbas s-taməntəka n-eläm, iddar s-tašwalt d-torawät.

⁷ Ixaṭṭāb, ijanna i-tamətte: «Ad-hi-dd-išrəy-i hi-ojārān tārna, ij'-ahi tifut ta-dāḡ s-wār-ānhājḡ wāla-dāḡ d-ad-əddunkuḡ i-ad-arāḡ issal n-tifādelen-net.

⁸ Näkk, aman a dāḡ-kāwān-salmaḡāḡ, māšan ənta, Unfas Šaddijān a dāḡ-kāwān-e-isəlmāḡ.»

Atwəsəlmāḡ n-Ḣisa

(Mätti 3:13-17; Luqa 3:21-22)

⁹ Išilan-win-dāḡ a dāḡ-dd-ifäl Ḣisa taḡrəmt ta n-Nāširāt hāt teje ta n-Galila, ikkā-dd Exya, issəlmāḡ-t dāḡ-aman n-ejānš wa n-Ḣurdəni.

¹⁰ Diha-dāḡ dd-izjār aman, ad-inhāy išənnawān a-s dd-āmerān, äzzubbāt-dd fälla-s Unfas Šaddijān dāḡ-ännuḡ n-tedäbert mällät,

¹¹ ijmāḡ-dd eməsli išənnawān, innān: «Kāyy-i-dāḡ a-s Rure-ḡ wa əkneey tārha, kāyy a dāḡ-āsriwān iman-in.»

Äžžurrāb Iblis Ḣisa

(Mätti 4:1-11; Luqa 4:1-13)

¹² Šik qarāt-a-wen, oḡād Unfas n-Mässināḡ Ḣisa s-tenere,

¹³ ijā dāḡ-s əkkoḡāt timərwen n-ašäl, itizərrub-t Iblis, irtay d-iwāḡsan, äxdamān-as änjälosän.

Sānto n-āmašal n-Ḣisa Älmasex

(Mätti 4:12-17; Luqa 4:14-15)

¹⁴ Ittärmäs Exya wa n-Enəssəlmāḡ ḡas, ikkā Ḣisa teje ta n-Galila, ad-dāḡ-s ixatṭāb isālan n-Älənžil n-Mässināḡ.

15 İjanna i-äddinät: «Täqqän täwwäd! Təmmənəya n-Mässinəx, tohäz-dd; utabät, tamənäm s-isälan n-Älənžil.»

*Inəttulab n-Ÿisa wi äzzarnen
(Mätti 4:18-22; Luqa 5:1-11)*

16 Älliil Ÿisa asälim n-ejänš wa n-Galila a-s inhäy Simyon d-änŸa-s İdris, təjjarän titarren-näsän dəx-aman ed iməhhuyya n-imənan a ämoosän.

17 Inn'-asän Ÿisa: «Elkəmət-ahi, ad-kəwän-äjəx meddən sār-i dd-sadawnen äddinät i-ad-tän-äxləsəx.»

18 Oyyän titarren-näsän älwäqq-wen-dəx, əlkəmən-as.

19 İlla-hin i-dihen a əndərrän, inhäy Ÿisa dəgg-Zäbdi: Yaqub d-änŸa-s Exya, saməkraşän titarren dəx-turäft-nəsän ta n-aman,

20 iyr'-en-dd əssaḡät-wen-dəx. Oyyän abba-nəsän Zäbdi dəx-turäft ta n-aman ənta d-inaxdimän, əlkəmən-as.

*Amälşon wa äzozäy Ÿisa dəx-Qäfərnaxum
(Luqa 4:31-37)*

21 Əkkän taḡrəmt ta n-Qäfərnaxum; ij'-en aşäl wa n-əssəbət-i n-təsonfat dihen ḡas, ikka Ÿisaehän n-äddin wa n-käl-Älyähud, ad-dəx-s isaxra tamətte.

22 Eqqälän-dd äddinät ḡas oran imawän fäl əjjäruzät-i-dəx hasän-ija a-wa isaxra, ed isaxr'-en s-älxikmət n-ere issanän a-wa iha wädden, şund əlyulam wi n-Ättəwrät.

23 Ehän n-äddin-en, ih'-ee əhaləs ih' alşin, inhäy Ÿisa ḡas, ad-isaxərat, ijanna:

24 «Ya ʕisa wa n-Nəşirät, ma dāḡ-nāḡ tārhed? Ajān ahālak-nānāḡ a-s dd-tosed? ʕssanāḡ ere wa tāmoosād, kāyy-i-dāḡ a-s: Wa Šāddijān dd-āšmašāl Māssināḡ.»

25 Āsmāhād dāḡ-s ʕisa, inn'-as: «ʕṯṯəf emm-nāk, təzjārād āhaləs-i-dāḡ!»

26 Āššākādkād alšin āhaləs s-āššahāt, āşḡarāt dāḡ-işənnawān təzzar, izjār-t.

27 Issārmāḡ a-wa ijān āddināt, əqqālān-dd hak iyyān isastan amidi-net, ijanna: «Ma āmoos a-wa? Ma tāmoos teḡäre-ta-hi tāynayāt, tāşsohet? Wa ənta wāla alšinān e-d fälla-sān āsmāhād, ad-əjən a-wa inna.»

28 Šik-dāḡ a-s intāj isəm-net dāḡ-teje ta n-Galila iket-dāḡ-net.

Āzozāy ʕisa taḡāggalt n-Simyon d-imarhinān ājjootnen

(Mātti 8:14-17; Luqa 4:38-41)

29 Izjār-dd ʕisaehān n-āddin wa n-kāl-Ālyāhud ḡas, āddew d-Yaqub d-Exya s-ehān wa n-Simyon d-Idris.

30 A-s hin-əwwāḡān ehān, tāssinsa tenāde taḡāggalt n-Simyon. ʕllāḡen-as sār-s āddināt ālwāqq-wen-dāḡ.

31 Os'-e-t, irmās-tāt-dd s-āfuss, issəbdād-tāt, tərza fälla-s tenāde, təbdād, ad-tān-simjurut.

32 Toḡa tāfukt ḡas, āmewāyān-dd imarhinān d-iməlšan iket-nāsān,

33 āddew-dd aḡrəm iket-net dat-emm n-ehān-wen-dāḡ iha.

34 Āzozāy dāḡ-sān i ājjootnen əjrawnāt tākmoten wāren oleh, ikkās daḡ alšinān

äjjootnen dāx-äddinät. Alšinän ətänəq, wār tən-itəyy ämmijrädän ed əssanän ere wa ämoos.

Ämaşal n-Ÿisa s-teje ta n-Galila
(Luqa 4:42-44)

³⁵ Emäxär n-aşäl wa iyyädän, härwa janät tihay, inkär Ÿisa, ikkä tenere n-iman-net, ad-itəddal Mässinäx.

³⁶ Kälä has-itammäx Simyon d-imidiwän-net

³⁷ har t-əjrāwän, ənnän-as: «Tamətte iket-net a hak-təmmaxät.»

³⁸ Inn'-asän: «Näkket tidbi ti n-data-näx i-ad-hasnät-äxtəbäx ətänätəq-däx, ed a-wen-däx a-s dd-ämeşäläx.»

³⁹ Issäxläy-dd teje ta n-Galila iket-net, ixatṭäb dāx-ihānan n-äddin wi n-käl-Älyähud, itakkäs alšinän dāx-äddinät.

Äzozäy Ÿisa ähaləs ijraw jəri
(Mätti 8:1-4; Luqa 5:12-16)

⁴⁰ Osä-dd ähaləs ijraw jəri Ÿisa, irkäx data-s, ad-t-ilaqqäd, ijann'-as: «Afäl tärhed a-wen-däx, täddobed ad-hi-şəşdəjad.»

⁴¹ Tänx'-e tähanint-net, izzäl äfuss-net, idäs-t, inn'-as: «Ärheey-t, išdaj.»

⁴² Izzäy dāx-jəri älwäqq-wen-däx, şäddij.

⁴³ Ikn'-e Ÿisa asəmmətär təzzar, issəgl'-e māşan,

⁴⁴ inn'-as: «Wār jed isālan i-äwadəm wäl' iyyän, əgləw, səkən iman-näk i-u-tikutawen, təjed takute ta s-innä alämär wa n-Mosa dāx-isālan n-təşədje-näk i-ad-älläxät i-äddinät a-s təzzeyäd.»

⁴⁵ Mășan, igl' ähaləs-ənnin-däx ças, wär t-illa ere dăr-ämmoqqäs s-wädden ija däx-s isälan, äbas äddobät Yisa ad-ijjəš ayrəm wäl' iyyän ar s-ufär. Äqqima däx-tenere ad-sär-s dd-təffalän äddinät isrutän n-äkall iket-net.

2

Äzozäy Yisa ähaləs ibdanän (Mätti 9:1-8; Luqa 5:17-26)

¹ Härät n-išilan dərät-a-wen, oläs-dd Yisa uçel n-Qäfärnaxum. Eslän äddinät a-s ih' ehän wa däx-itizəbbut ças,

² əkkän-t-dd s-əjut har äbas t-illa edägg wälä-däx dat-emm n-ehän.

³ Ämmiijräd-asän dihen-däx a-s t-dd-osän əkkoç meddön ämisawäyenen anäbdon iyyän,

⁴ məšan, igdäl-asän əjut n-tamətte ad-t-sänsən dat-Yisa. Äçläyän, äwwänän afälla n-ehän, əkkäsän-in ajobän-wi äsiitəxnen ehän däx-tanəmhäla n-edägg wa däx-ibdäd Yisa, ästärarän-dd s-axäbabu wa jän anäbdon, insa fäll-asəftäx-net.

⁵ Inhäy Yisa immun-näsän ças, innä i-anäbdon: «Alyaç, ätwänšän-ak ibäkkadän-näk.»

⁶ Edägg-en, han-t härät däx-älçulam n-Ättäwrät. Eslän i-a-wa inna ças, äbjänjänän,

⁷ ad-jannen: «Wa ma t-äsihälän mäjräd-wa-däx? Äskafär! Mi äddoben tenäšše n-ibäkkadän säl Mässinäx?»

⁸ Ilmäd Yisa xur-iman-net älwäqq-wen-däx a-wa däx-zinəzjumän, inn'-asän: «Mafäl tajjšän erk inəzjam šund-wi-däx ulhawän-näwän?

⁹ Ma ojärän täräyse jer-ad-tənnəd i-anäbdon: «Ätwänšän-ak ibäkkadän-näk,» d-ad-has-tənnəd: «Əbdəd, ədkəl asəftäx-näk, ärjəš.»

¹⁰ Ašäl-i, ässiilmädäx-käwän a-s Ägg-ägg-adəm, ijraw fäll-ärori n-äkall turhajät n-tenäšše n-ibäkkadän.» Innä Yisa i-anäbdon darät-a-wen:

¹¹ «Ənney-ak, əbdəd, ədkəl asəftäx-näk, əqqəl ehän-näk.»

¹² İbdäd, idkäl asəftäx-net ässağät-wen-däx, iglä hannäyän-t äddinät iket-däx-näsän. Äqqiimän-dd xas, tof'-en təkunt n-a-wa ijän, tiimələn Mässinäx, jannen: «A-wa ijän ašäl-i-däx, wär käla t-nənhäy.»

*Iyrä-dd Yisa Lewi i-ad-umas änätçalib-net
(Mätti 9:9-13; Luqa 5:27-32)*

¹³ Oläs Yisa azəjor, ikk' asälim n-ejänš wa n-Galila, ad-t-dd-takkän äddinät äjjootnen, isağr'-en.

¹⁴ İgla däx-a-wen-däx a-s inhäy Lewi ägg Älfa, äqqiima däx-edägg n-älxidmät-net, ämoos änarmas n-tiwse, inn'-as Yisa: «Əlkəm-ahi!» İbdäd Lewi, ilkäm-as.

¹⁵ Darät-a-wen, äsmäjärät Lewi Yisa s-ehän-net. İtağäyma Yisa däx-edägg wa n-imənsiwän a-s erk äddinät han inarmasän n-tiwse äjjootnen has-əlkammen da-däx; osän-dd, änğäymän dər-s ənta d-inəttulab-net.

16 Ənhäyän älyulam n-Ättäwrät n-taggayt ta n-käl-faris a-s ohar Yisa d-erk äddinät d-inarmasän n-tiwse ƣas, ənnän i-inəttulab-net: «Mafäl itihär älyalim-näwän imənsiwän d-inarmasän n-tiwse d-erk äddinät?»

17 Isl'-asän Yisa ƣas, inn'-asän: «Äddinät ässoxätnen, wär-ämƣatärän s-läxtur; imarhinän a sār-s ämiƣatärnen. Näkk, wär dd-ämešäläƣ s-äddinät-wi ordänen iman-näsän iƣqud, inäsbäkkadän a-s dd-ämešäläƣ.»

Isälan n-äzum

(Mätti 9:14-17; Luqa 5:33-39)

18 Ašäl iyyän d-äzumän inəttulab wi n-Exya d-käl-faris, osän-dd äddinät Yisa, ənnän-as: «Mafäl inəttulab wi n-Exya d-käl-faris tuzamän, a-s ija a-wen wi-näk əntäneđ, wär tuzamän?»

19 Inn'-asän Yisa: «Ajän käl-tuksest, ilzam-tän äzum a ikk' ämazlay ill'-e jere-sän? A ikk' ämazlay ill'-e jere-sän, wär tän-ilzem ad-uşamän.

20 Əlkamän išilan wi tän-e-ifəl, dihen, ad-əjrəwän s-äzum.

21 Wär t-illa ere itəggatän tikəst i-temälsit wäššärät s-taswədt n-tabdoƣt täynayät. Afäl ija a-wen, wär-e ähaj a-s dd-e-təsär taswədt ta täynayät fäll-temälsit ta wäššärät, täjj amənd ojärän wənnin.

22 Wär t-illa daƣ ere itajjän aman n-läxnəb äynaynen, äxxiimmärnen däƣ-ijdad. Ere ijän a-wen har käfän aman-ənnin däƣ-ijdad, ad-has-səbbuƣqen ijdad-net, ifut ɗarät-a-wen däƣ-läxnəb hakd-däƣ däƣ-ijdad. Aman n-läxnəb

äynaynen äxxiimmärnen, iddidän äynaynen a dāḡ-tän-itajj äwadəm.»

*Isälän n-ašäl wa n-əssəbət-i n-täsonfat
(Mätti 12:1-8; Luqa 6:1-5)*

²³ Ašäl iyyän n-əssəbət-i n-ašäl wa n-täsonfat, iräs Ƴisa d-inəṭṭulab-net išəkraš n-älkäma ad-dāḡ-sän dd-nakkädän inəṭṭulab-net tiḡäḡänen n-älkäma.

²⁴ Ənhäyän härät dāḡ-käl-faris a-wa tän-išlän Ƨas, ənnän-as: «Ənhəy, ma isawäjjen inəṭṭulab-näk a wärän-itətwəjj dāḡ-ašäl wa n-əssəbət-i n-täsonfat?»

²⁵ Inn'-asän Ƴisa: «Adiš käwäneḍ, käla wär täḡrem dāḡ-əlkəttab a-wa ija Dawəd a-s əmḡatär, älluz ənta d-imidiwän-net.

²⁶ Ätwänn'-anäḡ, ijjäš ehän n-Mässinäḡ dāḡ-äzzäman wa d-ämoos Äbyatär ämänokal n-käl-tikutawen, ikša dāḡ-tijəlwen-ti ämoosnen takute i-Mässinäḡ, s-wär t-illa ere s-t-təlla tetäte-näsnät a säl käl-tikutawen, ikfa dāḡ-snät daḡ meddən wi dār-s äddewnen.»

²⁷ Inn'-asän daḡ: «Wädden ägg-adəm a dd-ixlākän i-əssəbət, änn-ak, əssəbət a dd-ixlākän i-tänoflayt n-ägg-adəm.

²⁸ A-wen-dāḡ a fäl Ägg-ägg-adəm, a ännihädän dāḡ a-wa s-ila ägg-adəm d-a-wa s-wär ila s-ad-t-äj, dāḡ-ašäl wa n-əssəbət-i n-täsonfat.»

3

*Äzozäy Ƴisa ähaləs s-äqqur äfuss-net
(Mätti 12:9-14; Luqa 6:6-11)*

¹ Oläs Yisa ɗarät-a-wen uješ n-ehän n-äddin wa n-käl-Älyähud. Ill'-e dihen ähaləs s-äqqur äfuss-net.

² Jan-as käl-faris ənniyät, tassänän ihäl ad-t-izuzəy dəx-ašäl n-älɣibadät, əjrəwän ya əsaru s-t-əssədlämän.

³ Innä Yisa i-ähaləs wa s-äqqur äfuss-net: «Əyyäw, əbdəd dəx-ammas n-älžämaɣät.»

⁴ Innä i-älžämaɣät ɗarät-a-wen: «Ak a xälälän dəx-ašäl wa n-əssəbət-i n-täsonfat iji n-emärked, meɣ iji n-a läbasän, igguɣ n-iman, meɣ iji n-iman?» Wär t-illa ere has-innan härät.

⁵ Issäɣläy-tän-dd asäwaɗ n-aɗkär irtayän d-tisnant fäl təssəba n-təɣart-i jän ulhawän-näsän, innä ɗarät-a-wen i-ähaləs: «Əzzəl äfuss-näk». Izzäl äfuss-net, izzäy.

⁶ Əzjārän käl-faris edəgg-en ɣas, änmänhäyän d-taggayt ta n-käl-Harudəs dəx-isälan n-əmmək wa s-mad-əjən iman n-Yisa.

Äzozäy Yisa äddinät äjjootnen dəx-tamətte

⁷ Äddew Yisa ɗarät-a-wen d-inəttulab-net s-asälim n-ejänš wa n-Galila, täddew-dd sār-s tamətte täjjeet dd-falät teje ta n-Galila d-ta n-Älyähudəyät,

⁸ iyyäd falän-dd Yärussälam, iyyäd äkall wa n-Iduma d-äkall wa iwärän ašrut wa n-emäynäj n-ejänš wa n-Yurdəni d-iɣärman wi n-Tir d-Säyda d-älžämaɣät äjjeen dd-ikkan daw-mäsällät n-härätän wi itäj.

⁹ Innä Yisa i-inəttulab-net älwäqq-wen, ad-has-səmməjnun turäft n-aman ijjäš i-ad-wär t-täsnäkmäm tamətte

¹⁰ fäl-a-s äzozäy dăḡ-sän i äjjootnen hundäḡ har ämära-dăḡ, eqqälän-dd äddinät hak iyyän itikəl amidi-net fäl tärha n-ad-t-äḡəsən.

¹¹ Iməlaşan əntəneḡ, e-d t-ənhäyän, ad-ärkäḡän data-s, saḡären, jannen: «Käyy a-s Rure-s n-Mässinäḡ»

¹² mäšan, ikann dăḡ-sän asəmmähəḡ i-ad-wär-əlläḡen ere wa ämoos.

Inəmmušal wi n-märaw d-əssin
(Mätti 10:1-4; Luqa 6:12-16)

¹³ Iwwän Ȳisa qarät-a-wen taḡaḡt, iḡrä-dd s-iman-net inəṭṭulab wi s-irha, əkkän-t-dd.

¹⁴ Äsnäfrän dăḡ-sän märaw d-əssin wi s-irha i-ad-t-əllan ḡur-s, äswär-tän isəm inəmmušal wi n-inaxṭabän n-Älənžil,

¹⁵ ikf'-en daḡ tärna n-ukəs n-alšinän dăḡ-äddinät.

¹⁶ Əntəneḡ-da wi n-märaw d-əssin äsnäfrän: Simyon wa äswär isəm Bəṭrus;

¹⁷ Yaḡub d-änḡa-s Exya, wi n-dägg-Zäbdi s-ij' isəm Boyärnažəs, a-wen älmäḡna-net: dägg-ejjaj;

¹⁸ Idris d-Fəlibb d-Bärtälämma d-Mätti d-Tomi d-Yaḡub wa n-ägg Älfa d-Tade d-Simyon wa n-äššəzəḡ

¹⁹ d-Yähudəs Isxaryut-i t-e-isəssäḡdärän.

Torda n-käl-ehän n-Ȳisa
(Mätti 12:22-37; Luqa 11:14-23; 12:10)

²⁰ Iqqäl-dd Ȳisa ehän ḡas, oläs-dd fälla-s älzämaḡät tidawt har äbas ijraw ənta d-inəṭṭulab-net wälä älwäqq s-ässokän härät imawän-näsän.

21 Ǝslān kāl-ehān-net i-a-wen ƣas, əkkān-t-dd i-ad-t-ärməsān fāl-a-s jannen: «A-wa, immar-t hārāt.»

Ehān s-əknasān məssaw-s, wār-e āhaj

22 Ǝggādān ālƣulam n-Ātṭāwrāt wi dd-fālneŋ Yārussālam, ənnān: «A-wa Abālzābil, Iblis wa n-āmānokāl n-alšinān a t-ihan, ənta a t-ikfān tārna ta s-itakkās alšinān dāƣ-āddināt.»

23 Iyr'-en-dd Ƴisa, issāylāy-tān tangalt dāƣ-hasān-inna: «Ǝndek əmmək wa s-tordam a-s Iblis āddoobāt, ad-dd-iqqəl isattāy Iblis?»

24 Afāl dd-əqqālān kāl-iyyān n-əddəwəl əknasān jer-iman-nāsān, əddəwəl-en, wār-e āhaj ibdad.

25 Ehān daƣ s-dd-əqqālān məssaw-s əknasān jer-iman-nāsān, ehān-en, wār-e āhaj ibdad.

26 Afāl ibdād Iblis i-iməššerəkān-net, ad-tān-ikannās, wār-e āhaj ibdad, sāmdo-net ƣas a ikka.

27 Wār t-illa ere āddoben uješ n-ehān n-āhaləs n-anākfor, awəy ilalān-net ar s-ad-t-ikrad təzzar, dihen, ad-udabāt ad-awəy a-wa ihān ehān-net.»

Abākkaḍ wa s-wār t-təlla tenāšše-net

28 «Āsidätteƣ-awān a-s abākkaḍ of'-āgg-adəm d-asəkkufār ija-dāƣ, āddoobāt Māssināƣ ad-has-t-in-ānš,

29 māšan āwadəm wa āskafārān dāƣ-isālan n-Unfas Šāddijān, wār-ilkem ad-has-in-ātiwānša, ed iwār-t uḍlem n-abākkaḍ ixlalān.»

30 Ij'-asān Ƴisa məjrād-wa-dāƣ fāl a ənnin s-ənnān: «Ih'-e alšin.»

Anna d-ayətma-s n-ÿisa wi n-tidət
(Mätti 12:46-50; Luqa 8:19-21)

³¹ Osän-dd ayətma-s n-ÿisa äddeewän d-ma-s, əbdädän dat-emm n-ehän, äšmašälän-dd sār-s əwadəm i-ad-hasän-t-dd-iyǟr.

³² A-s itäjji a-wen-dǟx, äqqiima ÿisa jer-tamətte has-jat afäraj; ənnän-as äddinät: «Təbdad ma-k d-ayətma-k [d-šätma-k] dat-emm n-ehän, sasantänän dār-k.»

³³ Inn'-asän: «Əndek anna-nin d-ayətma-x [d-šätma-x]?»

³⁴ Issäxlay-dd tamətte ta täqqimät akäyadnet, innä: «Ənhəywät anna-nin d-ayətma-x, əntänəḍ-da-dǟx.

³⁵ E d t-illäm ere itamašalän erhet n-Mässinǟx, ənta a-s əñña-x d-wälätma-x d-ma-x.»

4

Tangalt ta n-änäsdamu
(Mätti 13:1-9; Luqa 8:4-8)

¹ Oläs ÿisa dāx asəxär n-tamətte də̄x-asälim n-əjäñš wa n-Galila. Täddew-dd sār-s tamətte täjjeet, ijjäš-as turäft n-aman, äqqima də̄x-s, täqqimä-dd tamətte ənta təbdad də̄x-asälim n-aman, täsijäd-as.

² Issäxra äddinät hǟrätän äjjootnen s-tangalen. Də̄x-a-wa tän-issäxra, inn'-asän ašäl iyyän:

³ «Säjdät! Kälä izjār änäsdamu iyyän i-ad-iddumət ašəkrəš-net.

⁴ Älwäqq wa d-itidumut, oḍänät tiblalen tiyyäd də̄x-äbara, äkkukären-tänät-dd igḍaḍ, əksän-tänät.

⁵ Oða ašär iyyän jer-tihun, äffoqqät-dd šik ed wär-intem dāḡ-äkall,

⁶ täsmäqqät-dd täfukt jənnəj-s, təssärya isəffuqqa, äqqur-in a-di iket-net ed wär-əntemän ikewän-net dāḡ-härät.

⁷ Oða ašär iyyän dāḡ-tabəññənt, tədwäl-dd fälla-s tabəññənt, təzmäd-as, iyräy-in.

⁸ Oða ašär wa iyyädän dāḡ-äkall olayän, ikräš aratan; ijä tiboläsen s-tiyyäd kərədät timərwen n-tablalt a tänät-iwarän, tiyyäd sädisät timərwen, tiyyäd temeđe.»

⁹ Inn'-asän qarät-a-wen: «Ere ilän timəzzujen s-islä-dāḡ, isäjdət!»

*Äddälil wa fäl isayra Yisa tamətte s-tangalen
(Mätti 13:10-17; Luqa 8:9-10)*

¹⁰ Izjār-dd Yisa älzämaḡät ḡas, əssəstänän-t inəṭṭulab-net wi n-märəw d-əssin, d-äddinät wi sār-s dd-saḡlaynen d-älmäḡna n-tangalen ti ija.

¹¹ Inn'-asän: «Käwänəḍ, təjrawäm turhajät n-ujreh n-əddäraj wa ämoosän isälan n-Təmmənəya n-Mässināḡ mäšan, äddinät wi iyyädnen n-ajäma, a-wa s-e-əslən iket-net, tangalen a dāḡ-has-e-əslən i-innin:

¹² <Ad-əswaḍän, wär hənnəyän, äsijädän, wär səllən; i-ad-wär t-illa a jarrähän, i-udaḡ ad-utabän s-Mässināḡ, əjrəwän tenäšše.> »

*Älmäḡna n-tangalt ta n-änäsdamu
(Mätti 13:18-23; Luqa 8:11-15)*

13 Inn'-asən daɣ: «Ƴas ta-däɣ tangalt, wär tāt-təjrehäm? Adiš əndek əmmək wa s-mad-təjrahäm tangalen ti iyyädnen?

14 Änäsdamu, ənta a-s ənaxtab n-mäjräd n-Mässinäɣ.

15 Äddinät iyyäd, olähän d-äbara wa däɣ-ođänät tiblalen. E-d əslän i-mäjräd n-Mässinäɣ, šik a-s tän-dd-itis Iblis, isəttəw-asən-t-in.

16 Äddinät iyyäd, olähän d-tihun-ti jer-ođänät tiblalen; e-d əslän i-mäjräd n-Mässinäɣ, ad-əhləyləyän, əqbəlän-t šik

17 məšan, wär t-təyyən ikraš ikewän däɣ-ulhawän-näsän, ad-əjən äzzaman əndərrän äkoyädän däɣ-s məšan afäl dd-tosa tissust meɣ osä-dd əlyızabät däɣ-təssəba n-mäjräd n-Mässinäɣ, ad-hin-əbbütəlän a-wa s-omänän.

18 Äddinät iyyäd, əntəneđ a-s tabəŋŋənt ta jer-ođänät tiblalen, ad-əslən i-mäjräd n-Mässinäɣ

19 məšan, ad-has-əzmədän däɣ-ulhawän-näsän s-tərha n-wälät-äddunya d-eyläl n-tərha n-ajmur-net d-derhanän iyyäd äjjootnen, wär t-illa a sār-sän dd-isaysal.

20 Äddinät wi iyyädnen, əntəneđ a-s äkall wa oləɣän däɣ-ođänät tiblalen. Īntəneđ a-s e-d əslän i-mäjräd n-Mässinäɣ, ad-t-əqbəlän, ijješ-asən-t əlfäyda; tarəw-dd sār-sän tablalt tiyyät kərədät timərwen n-tablalt, tiyyät sädisät timərwen, tiyyät temede n-tablalt.»

*Tangalt ta n-tefätelt
(Luqa 8:16-18)*

21 Inn'-asän Yisa day: «Äwadəm, wär-isärmis tefätelt təzzar, äj'-et daw-äkoss meḡ daw-tešejit, änn-ak, edägg idkalän a fäll-tät-e-isäns.

22 Wär t-illa a iffarän s-wädden ad-dd-infiləl, wär t-təlla takše s-wädden ad-dd-təffukkär.

23 Ere dāḡ-wän ilän timəzzujen s-islä-dāḡ, isäjdet!

24 Äjät ənniyät i-a-wa s-salläm fäl-a-s, a-wa dār-ogdäh asjəd wa täjjäm i-Mässinäḡ ad-där-mad-agdäh day ajäraw-näwän ḡur-s.

25 Äwadəm wa s-išwär ifhäm häřät, ad-ḡas-iwwaḡ musnät har isəssikəy mäšan, wa s-wär t-illa a ijrah, wär t-in-ikka häřät, änn-ak, ad-dāḡ-s ämahāḡ wäla a-wa əndärrän ittäf.»

Tangalt ta n-temättäwt

(Mätti 13:31-35; Luqa 13:18-19)

26 Inn'-asän day: «Sänto n-Təmmənəya n-Mässinäḡ, oläh d-a-wa s-e-d äddomät äwadəm ašəkrəš-net,

27 jer-ittaş wäla okay, jer-ehäd wäl' ašäl, ad-idaggäl ädomm dāḡ-ašəkrəš, itifäqqut-dd, dāḡ-a-s, wär təha tijya n-a-wen mässi-s ed,

28 äkall a dd-madän-arəw d-iman-net teyəšše s-tizarät, dara-s teḡäḡänt, təzjār-dd tejent n-älkäma teḡäḡänt.

29 Diha-dāḡ d-mad-inhöy mässi-s n-ašəkrəš a-s inḡa älkäma, ad-dd-mad-idkəl älgori-net i-illuy-net.»

30 Inn'-asän darät-a-wen: «Ma dār-mad-nəsəsiläh sänto n-Təmmənəya n-Mässinäḡ? Əndek ḡas tangalt täsisäjrähät sänto-net?

31 Sǎnto n-Təmmənəya n-Mässinǎx, olǎh d-temǎtǎwt ta tojǎrǎt təmmətkit dǎx-idommǎn. A-s tǎt-itidumut ǎwadəm, wǎr t-təlla temǎtǎwt dǎx-ǎddunya tǎt-tojǎrǎt təmmətkit,

32 mǎšan, hǎkd a-wen-dǎx, afǎl tǎt-ǎddomǎt ǎwadəm, ad-dd-tǎjj tadǎwla-i-dǎx mǎqqǎrǎt, tajǎr tiyəššawen iket-nǎsnǎt təššəjrət, tək-rəš iləktan-i-dǎx mǎqqornen har wǎla-dǎx igdǎd, kallǎn daw-tele-net.»

33 Tangalen ǎjjootnen olǎhnen d-ti-dǎx, s-ǎlخال ǎsisǎjrǎhǎn a-s issǎxra ʃisa ǎddinǎt;

34 wǎr t-illa a inna i-tamətte s-wǎdden tangalen a dǎx-hasǎn-t-innǎ mǎšan, e-d ǎnmǎjrǎw d-inəttulab-net dǎx-edǎgg ištǎrǎn, ad-hasǎn-ǎffǎssǎr ǎlmǎxna n-tangalen-tin-dǎx iket-nǎsnǎt.

ǎssasǎm ʃisa ǎdu d-ejǎnš

(Mǎtti 8:23-27; Luqa 8:22-25)

35 Tođa tǎfukt xas, innǎ i-inəttulab-net: «Nəjləyet ejǎnš s-ašrut wa n-emǎynǎj.»

36 Fǎlǎn tamətte, əglǎn dǎr-s inəttulab dǎx-turǎft n-aman ta dǎx-ǎqqiima, ǎddeewnǎt dǎr-sǎn dǎx turfen n-aman tiyyǎd.

37 Əglan a-s dd-inkǎr ǎdu-i-dǎx ǎšsoohen, ad-tibhilbəhlnǎt tinǎzzǎmǎren i-turǎft har ištǎr tədnay aman.

38 A-s itǎjj a-wen, ǎssoomǎt ʃisa adǎfor, ittas dǎx-ajilal n-turǎft n-aman. ǎssənkǎrǎn-t inəttulab dǎx-edəs, ənnǎn-as: «ǎlxalim! Ajǎn wǎr kǎy-təssǎrmǎx tamǎttant-nǎnǎx?»

39 Inkǎr-dd, ǎsmǎhǎd fǎll-ǎdu, innǎ i-ejǎnš: «Ismǎd! ʔzjəw!» Ibdǎd-in ǎdu, sǎmmed-in a-wen-dǎx iket-net.

40 Inn'-asän darät-a-wen: «Ma-käwän ässiirmäxän? Ma ija immun-näwän?»

41 Jän inəttulab tarəmmeyt-ta-däx fäl dd-əqqälän xas, tinmənnin: «Ma ämoos äwadəm-wa-däx s-wäla ađu d-ejänš, sajadän-as?»

5

Äzozäy Yisa amälšon iyyän (Mätti 8:28-34; Luqa 8:26-39)

¹ Ewwädän-in ašrut n-ejänš wa iyyädän, a-wen däx-äkall wa n-Gadara.

² Diha-däx dd-izjār Yisa turäft n-aman, ad-has-dd-ilkäđ amälšon dd-izjarän tižəska.

³ Dihen-däx ad-izzaḡ, wär t-illa äwadəm äddoben akärad-net wäla-däx s-tišəm.

⁴ Akärad has-jän äddinät s-tifren hakd tišəmdäx, ad-tänät-dd-isäqqətəs, wär t-illa fäw ere äddoben a däx-s ännähäd.

⁵ Ehäd d-ašäl iha tižəska, meḡ ošal fäll-iđayän, inađdāw iḡaran, išašar iman-net s-tihun.

⁶ Ojja Yisa däx-ijəj xas, ošal-dd sār-s, irkäḡ data-s,

⁷ idkäl eməsli-net, innä: «Yisa, Rure-s n-Mässinäḡ wa iknän ađkul, ma däx-i tärhed? Fäl Mässinäḡ, wär hi-täqquzzäbed.»

⁸ Alšin wa t-ihän a ijannen a-wen ed isamähäd Yisa fälla-s i-ad-t-izjār.

⁹ Issəstän-t Yisa, inn'-as: «Mi isəm-näk?» Inn'-as ähaləs: «Isəm-in: ejhän ed nəjjət.»

¹⁰ Ad-laqqädän alšinän wi t-hänen Yisa i-ad-tän-wär-ikkəs däx-äkall.

11 A-s itäj a-wen-däx, idan ehäre n-əlxənžärän fäll-tasäja n-tadaxt hat attayän-en-däx.

12 Ad-laqqädän alšinän Yisa, jannen-as: «Sukanäx əlxənžärän i-ad-tän-nəjjəš.»

13 Ird'-asän s-a-wen. Əzjärän alšinän əhaləs, əjjäšan əlxənžärän, ad-dd-titrəktərikän a iwwädän əssin afdän n-əlxənžär, wa-däx n-afälla n-tadaxt, tiđəwän däx-ejänš, tattän-tän aman.

14 Ənhäyän imədanän n-əlxənžärän a-wa ijän xas, əjewädän. Ošälän, jän isälan däx-käl-ayrəm d-attayän-net. Ad-dd-tišəl tamətte, tiwnifit-dd a-wa ijän.

15 Osän-dd äddinät edəgg wa iha Yisa, ogəzän-dd amälšon wa s-käla t-ih' ejhän n-alšinän, əqqiima, ij' iselsa, təh'-e dəx tija n-iman-net.

16 Jän däx-sän äddinät wi əjjəyhnen i-a-wa ijrəwän amälšon d-əlxənžärän isälan xas,

17 ad-təddalän Yisa d-ad-ifəl əkall-näsän.

18 Älwəqq wa d-itajjəš Yisa turəft n-aman, ikk'-e-hi-dd əhaləs wa s-käla t-hän alšinän, ad-t-ilaqqəd d-ad-där-s idaw.

19 Wär has-irđa Yisa s-a-wen, änn-ak, inn'-as: «Əgləw, əqqəl ehän-näk, diha t-əllän išəqqayän-näk, təlləyed-asän təmyäre n-a-wa hak-ija Eməli d-əmmək wa s-hak-odän təhanint.»

20 Iglä, ad-itajj isälan n-təmyäre n-a-wa has-ija Yisa däx-teje ta jät isəm: «Ta n-məraw iğərman». Ere has-islän-däx, ad-dd-iqqəl xas əkun däx-isälan-net.

Isälan n-elle-s n-Žayrus d-taməđt ta dd-izajjər

ašni

(Mätti 9:18-26; Luqa 8:40-56)

²¹ Izjār Ƴisa ɗarāt-a-wen s-asālim n-ejānš wa iyyādān, diha-dāḡ dd-āsjanān dāḡ-asālim n-aman, ad-sār-s dd-tāddew tamətte tājjeet.

²² Os'-e-hi-dd dihen iyyān dāḡ-ālfāqqitān n-ehān n-āddin wa n-kāl-Ālyāhud n-taḡrəmt-en s-isəm-net Žayrus, inhāy Ƴisa ḡas, irkāḡ data-s,

²³ ad-t-itəddal, ijann'-as: «Talyaɗt-in, tābok i-iba, nidawet sār-s, sənsəd fälla-s ifassān-nāk, ad-təzzəy, təddār.»

²⁴ Āddew dār-s Ƴisa, təlcam-as daḡ tamətte tājjeet t-tāsinākmāmāt.

²⁵ Tamətte-en, h'-et tamāɗt ijammāɗ ašni a ilan māraw iwətyan d-əssin,

²⁶ təkna ahānay n-aḡāna jer-ifassān n-lāxturtān, tāsmlkāw-in a-wa təla iket-net māsan, wār t-illa fāw a-hin-ifnažān dāḡ-turhonna-net, ānn-ak, tiwwaɗt ḡas ad-dd-tajj fälla-s.

²⁷ Təsl' isālan n-Ƴisa ḡas, təjjāš-dd tamətte s-ɗarāt, ɗəs erāswāy-net,

²⁸ ed a-s tājj a-wen-dāḡ, janna: «Wāla erāswāy-net, kud-t-ɗāsāḡ, ad-əzzəyāḡ.»

²⁹ Diha-dāḡ d-ɗās erāswāy-net, ad-iktāl ašni wa tāt-dd-izajjārān, tofrāy āssaḡāt-wen-dāḡ dāḡ-taḡəssa-net a-s təzzāy dāḡ-tizḡurt-net.

³⁰ Ilmād Ƴisa ḡur-iman-net, ālwāqq-wen-dāḡ, fāl tārna ta t-dd-təjmāɗāt, innāɗ-dd s-tamətte, innā: «Mi iɗāsān isəlsa-nin?»

³¹ Īnnān-as inəṭṭulab-net: «Ajān wār hōnnəyād tamətte ta kāy-tāsinākmāmāt a-s jānned: <Mi hi-iɗāsān?> »

³² Issäxläy-tän-dd akäyad-net i-ad-inhöy ta t-tədəsät.

³³ Tənhäy tamədt älafu wa təjrəw ɣas, təkək'-e-hi-dd, täšikəkəkəkəd a-wa-däɣ has-ja tarəmmeyt, toda data-s, tənn'-as tidət iket-net.

³⁴ Inn'-as ɣisa: «Talyədt, äzozäy-käm immun-näm, əgləw dəɣ-älxer, təzzeyəd dəɣ-tizzurt-näm.»

³⁵ Ämmiijräd ɣisa härwa a-s dd-osän äddinät dd-falnen eyewən n-älfäqqi n-ehän wa n-äddin, ənnän-as: «Elle-k, äba-tät. Ma s-saläyyaxəd Älyalim dəɣ?»

³⁶ Wär hin-ijreh ɣisa a-wa jännen, innä i-älfäqqi n-ehän wa n-äddin: «Wär tärmeɣəd, amən ɣas.»

³⁷ Igdäl ɣisa i-äddinät iket-näsän ad-där-s idawän a-s təggädäd Bətrus d-Yaqub d-Exya wa n-ənḡa-s.

³⁸ A-s hin-əwwädän eyewən n-emännähəd n-ehän wa n-äddin, wär hin-ogežän ar tamətte tədgazät; äsikäläl, äššurša a-wen-däɣ, dəɣ-išənnawän.

³⁹ Ijjäš-in fälla-sän, inn'-asän: «Ma käwän-idgazän, halläm? Tarat, wär tät-äba, eḡəs ɣas a ja.»

⁴⁰ Jän-t tekäškäšt. Izzəzjər-tän iket-däɣ-näsän, wär dd-äqqima dihen ar d-ti-s d-ma-s n-talyədt, d-inəttulab wi dər-dd-äddew. Ijjäš ḡarät-a-wen edəgg wa dəɣ-tənsa talyədt,

⁴¹ irmäs-tät-dd s-äfuss, inn'-as: «*Talita kumi*», a-wen älmäɣna-net: «Talyədt, ənnex-am, ənkär-dd.»

⁴² Təbdād talyadt əssaḡāt-wen-dəḡ, tərjəš. Talyadt-en-dəḡ, la məraw iwətyan d-əssin. Əqqälän-dd əddinät ḡas oran imawän fäl tihusay n-a-wa-dəḡ ijän.

⁴³ Ikn'-en-dəḡ Ƴisa asəmmətär i-ad-wär jen isälan n-a-wa ijän dəḡ-əwadəm wäl' iyyän təzzar, inn'-asän ad-tät-əkfən a təkša.

6

Iba n-immun n-käl-tayrəmt ta n-Nəşirät (Mätti 13:53-58; Luqa 4:16-30)

¹ Ifäl Ƴisa dihen, əddew d-inəṭṭulab-net s-tayrəmt ta dəḡ-idwäl.

² Ašäl wa n-əssəbət-i n-täsonfat, ijjäš ehän n-əddin wa n-käl-Əlyähud, ad-dəḡ-s isayra. Əsijädän-as əddinät əjjootnen äkuunnen dəḡ-a-wa ijanna, əqqälän-dd ḡas oran imawän, jannen: «Əhaləs-wa-dəḡ, əndek siha s-t-dd-iha a-wa itäj? Mi t-ikfän təlḡuləma d-tädabit n-iji n-tikunen ti itäj?

³ Ak a-wa, ajän wädden Ƴisa wa n-mənizye n-rure-s n-Märyäma n-əṇṇa-s n-Yaqub d-Yusəf d-Hudd d-Simonyon? Wädden šätma-s da-dəḡ əzzäḡnen jere-nəḡ.» Jän-as a-wen-dəḡ s-t-əzzayän asäkor, unjäyän sār-s omänän.

⁴ Inn'-asän: «Ənnäbi, wär t-ill' edəgg s-wädden ätiwäsəmḡär dəḡ-s, ar dəḡ-əkall-net, d-ḡur-imärawän-net d-dəḡ-ehän-net.»

⁵ Igdäl-as a-wen-dəḡ, ad-ḡur-sän əj tikunen säl härät dəḡ-imarhinän fäll-ässinsa ifassän-net, əzzäyän.

⁶ Tof'-e tākunt n-iba n-immun-nāsän. Issäxläy-dd ɟarät-a-wen dəḡ-attayän n-tidbi-en-däḡ, isaḡra äddinät.

*Äšmašäl Ƴisa inəṭṭulab-net s-əssin-əssin
(Mätti 10:5-15; Luqa 9:1-6)*

⁷ Iḡrā-dd Ƴisa inəṭṭulab-net wi n-māraw d-əssin ɟarät-a-wen, äšmašäl-tän s-əssin-əssin dəḡ-a-s tän-ikfa tärna fäll-alšinän.

⁸ Äsmätär-tän, inn'-asän: «Wär təɟkeläm dəḡ-asikəl-nāwän a säl täborit; wär täwweyäm äzzad, wäla šakkoš, wäl' azrəf,

⁹ asəsät tifädelen-nāwän, wär jem əssin iräswäyän.»

¹⁰ Inn'-asän daḡ: «Ehän təjjäšäm-däḡ, təzzäḡäm dəḡ-s har ašäl wa d-tässawäɟäm tekle.

¹¹ Edägg tosäm-däḡ, wär käwän-äsbärräkän məssaw-s, unjäyän s-asjed-hawän, əzjərät-t, täbbäkbäkäm tifädelen-nāwän i-ad-wär tänät-iləttäḡ wäla-däḡ äboqqal-net. Ilkam, ad-äjjäyh a-wen fälla-sän.»

¹² Eḡlän inəṭṭulab, ad-xaṭṭäbän i-äddinät i-ad-utabän,

¹³ takkäsän daḡ alšinän äjjootnen dəḡ-äddinät, šawwäyän inəbdan s-əzzäyt, zizuyän-tän.

*Tamättant n-Exya wa n-Enəsselmäḡ
(Mätti 14:1-12; Luqa 9:7-9)*

¹⁴ Isl' ämänokal Harudəs mawmaw n-Ƴisa ed ih' isəm-net imawän n-äddinät iket-nāsän. Jannen iyyäɟ dəḡ-sän: «A-wa Exya wa n-Enəsselmäḡ a dd-inkärän jer-inəmmuttan, a-wen-däḡ a t-ikfän tädabit n-tikunen-ti itamašal.»

15 Jannen iyyäð: «Äbo, a-di ännäbi Yöli», jannen wi iyyäðnen: «A-wa iyyän däx-ännäbitän wi n-ibda.»

16 Islä Harudəs i-a-wen ças, innä ənta: «A-wa Exya wa s-əssəfräsəx eçäf-net, ənta a dd-oläsän tanäkra jer-inəmmuttan.»

17 Äzzäman-en, Harudəs iman-net a omärän s-ad-ättärmäs Exya, ijješ tišem, itwəjar-in däx-takärmüt, däx-təssəba n-Harudəyät ta n-hänne-s n-əñña-s Fəlibb däx-s ohəx Harudəs,

18 fäl-a-s innin, inn'-as Exya: «Wär hak-xälal, ad-tärkəbäd hənne-s n-əñña-k.»

19 Təksär ya Harudəyät Exya fäl a-wen-däx, ad-tattär taməttant-net məšan, wär hənnəy taşləlt s-ja a-wen.

20 Äksud daç Harudəs Exya ed, issan a-s əhaləs oçadän n-eməşşeddəj a ämoos, oçaz-t däx-təssəba n-a-wen-däx. E-d has-əşjad ämmiiräd, ad-t-əkmun iman-net kud-däx, ijraz-as əşjed-has.

21 Han a-wen-däx a-s dd-tosa taməntelt ta s-taqqäl Harudəyät a ija a-wa-däx. Aşäl d-tajjän iməşlan wi n-isəkta n-tiwit n-Harudəs, əsməjarät-dd Harudəs käl-əlxəkum-net d-kuməndatän n-əlxəşkär-net d-imizärän n-teje ta n-Galila,

22 təjjäş-dd elle-s n-Harudəyät, ad-dalläl data-sän, ijröz a-wen i-Harudəs d-iməjarän-net. Içrä-dd ämänokal talyaqt, inn'-as: «Əttär däx-i a-wa tärhed, ad-ham-t-əkfäx.»

23 Ad-has-itəhhaç s-ad-tät-əkf a-wa däx-s təttär, kud-irha umas təzune n-əkall-net.

24 Təzjar talyaqt, tənna i-ma-s: «Ma däx-s mad-əttäräx?» Tənn'-as ma-s: «Əttär däx-s eçäf

n-Exya wa n-Enəsselmäx.»

²⁵ Täqqäl-dd ämänokal šik, tənn'-as: «Ärheḡ ad-hi-təkfəd ämära-däx eḡäf n-Exya wa n-Enəsselmäx insa däx-azāwa.»

²⁶ Ǝnxäsän iman n-ämānokāl hullan mäšan, äbas äddoobät uḡəl s-a-wa inna, ed ihäd-as s-ad-tät-äkf a-wa däx-s mad-təttär, a ämoos-däx, dat-imäjarän-net, wär-irha daḡ ad-ärz däx-tənnanet i-talyaḡt.

²⁷ Äšmašäl ässaḡät-wen-däx əssärdasi däx-wi jänen ənniyät i-ehän-net i-ad-dd-ifrəs eḡäf n-Exya. Ikk' əssärdasi takärmüt ta ih' Exya, ifräs-dd eḡäf-net,

²⁸ iwwäy-t-dd insa däx-azāwa, ikf'-e i-talyaḡt, təkf'-e talyaḡt i-ma-s.

²⁹ Ǝslän inəṡṡulab n-Exya tamättant-net ḡas, əḡlän, əḡkälän-dd tafəkka-net, əḡkän-t.

*Uḡəl n-inəṡṡulab wi äšmašäl Ƴisa
(Mätti 14:13-14; Luqa 9:10)*

³⁰ Ǝqqälän-dd inəṡṡulab wi äšmašäl Ƴisa, jän däx-s isälän n-a-wa jän d-a-wa əssäḡrän iket-net.

³¹ Inn'-asän: «Näkket edäḡḡ n-iman-nänäḡ, sunfəm a əndärrän.» Ij'-asän mäjräd-wen-däx, fäl-a-s igdäl-asän, əjut n-emerjaš n-äddinät wäla ässaḡät s-ässokän härät imawän-näsän.

³² Ǝjjäšän turäft n-aman, əkkän tenere n-iman-näsän.

³³ Ǝnhäyän-tän äddinät äjjootnen a-s əḡlän, əzzäyän-tän ḡas, fälän-dd iyärman iket-näsän, ošälän-dd har hasän-äzzarän fäw s-edäḡḡ wa əkkän.

³⁴ Izjār-dd Ƴisa turäft n-aman, inhäy øjut wa jän äddinät Ƴas, täñƳ'-e tähanint-näsän ed, olähän Ƴas d-tihatten wären la amäḍan, ad-tän-isayra härätän äjjootnen.

*Äsyäwän Ƴisa səmmos afdän n-ähaləs
(Mätti 14:15-21; Luqa 9:11-17; Exya 6:1-14)*

³⁵ Toḍa täfukt Ƴas, osän-t-dd inøttulab-net, ønnän-as: «Näkkäneḍ, edägg n-tenere a nøha, ij'-anäƳ ehäḍ;

³⁶ səgləw äddinät, ad-økkøn tidbi d-imäzzaƳän wi ohäznen, žønšən-dd a øksän.»

³⁷ Äwwežäb-asän Ƴisa, inn'-asän: «Un, äkfät-tän a øksän.» Ènnän-as: «Ajän a tärhed ad-näkk ayřem i-ad-dd-nøžänš tijəlwen n-sänatät timaḍ n-ärriyal n-azřef i-ad-nøšäks tamøtte-ta-däƳ?»

³⁸ Inn'-asän: «Èssənät-dd maniket tijəlwen läm.» Èlmäḍän-dd, ønnän-as: «Səmmosät tijəlwen d-øssin imänan.»

³⁹ Omär-asän ḍarät-a-wen s-ad-øbḍəwän äddinät, säqqaymøn-tän fäll-teyøšše ta ḍalet.

⁴⁰ Täqqima tamøtte s-temeḍe-temeḍe n-äwadəm, səmmosät-səmmosät timərwen n-äwadəm.

⁴¹ Iḍkäl Ƴisa tijəlwen ti n-səmmosät d-imänan wi n-øssin, äjožäy išənnawän, ämmoy i-MässinäƳ; äfräsfäräs tijəlwen, änkäḍnäkäḍ imänan wi n-øssin təzzar, ikfä a-wen-däƳ iket-net i-inøttulab-net i-ad-t-užanän jer-äddinät iket-näsän.

⁴² Èksän iket-däƳ-näsän har øyyəwänän.

⁴³ Äsdäwän-dd inøttulab a-wa dd-øjläšan, osän-t iḍnäy märaw deketän d-øssin n-tijəlwen d-imänan.

44 Səmmos afdän n-ähaləs a əksänen ašäl-wen-däx.

Irjäs Yisa fäll-aman
(Mätti 14:22-27; Exya 6:16-21)

45 Äsraräd Yisa darät-a-wen inəttulab-net s-ujəš n-turäft ta n-aman, izarän-as s-efäyy n-ejänš wa iyyädän, ebre n-taxrəmt ta n-Bätsäyda, ad-isagla ənta tamətte.

46 Fäl-t tamətte xas, iwwän taɗaxt tiyyät, ad-itəddal Mässinäx.

47 A-s ijä ehäd, təha turäft n-aman ta hän inəttulab ammas n-ejänš, a-s ija a-wen Yisa ənta, ih' asälim n-aman.

48 Ojj'-en äsimäxatär-tän aɗu šamad igla ehäd, ikk'-en-dd irjaš fäll-aman har dəroɗ tän-okäy.

49 Ənhäyän-t ikk'-en-dd irjaš fäll-aman xas, äxelän ämättänkul iyyän, ad-naɗɗawän ixäran.

50 Hannäyän-t məšan, indär-asän a t-əzzəyän a-wa-däx hasän-təja tarəmməxt. Ässewäl-asän šik, inn'-asän: «Əfləsät-ahi, näkk a-wa, wär tärmeɗäm.»

51 Ijjäš-dd fälla-sän turäft n-aman xas, ibdəd aɗu. Ämoos-asän a-wa ijän täkunt-i-däx məqqärät.

52 Indär-asän ujreh n-asjət wa ija i-tijəlwen fäl täxart-i-däx jän ulhawän-näsän.

Äzozäy Yisa imarhinän dəx-teje ta n-Žännäšarät
(Mätti 14:34-36)

53 Ijläy Yisa d-inəttulab-net ejänš, äsjänän dəx-äkall wa n-Žännäšarät.

⁵⁴ Diha-däx dd-əzjārān dāx-turāft n-aman, ad-əzzāyān äddināt Yīsa,

⁵⁵ ad-tišələn dāx-ākall iket-net, tazāwen-dd sār-s imarhinān fäll-tišija s-edāgg wa s-əslān ih'-e i-ad-tān-izuzəy.

⁵⁶ Edāgg osa-dāx, jer-iḡārman, tidbi, wāla ässukān, ad-dd-awəyān äddināt imarhinān-nāsān, tattārān ad-ādəsān kud-dāx afār n-erāswāy-net ed, ere t-iḡāsān-dāx, ad-izzəy.

7

Isālan n-alkum i-agnatān

¹ Əžžəmmāḡān-dd kāl-faris d-hārāt dāx-älḡulam n-Ättāwrāt dd-falnen Yārussālam s-Yīsa.

² Əjrāhān-in dāx-a-wen-dāx a-s tattān iyyād dāx-inəttulab-net, wār-ässerādān ifassān-nāsān.

³ Iqqān a-wen iḡāfawān-nāsān fāl-a-s kāl-faris d-kāl-Älyāhud iket-nāsān, ämoosān äddināt əlkammen i-älḡadatān wi hasān-dd-oyyān imārāwān-nāsān: wār hasān-t-təlla tetäte ar s-ad-ässerādān ifassān-nāsān har taḡmārt təzzar.

⁴ Afāl əkkān ässuk har t-dd-fälān, wār hasān-t-təlla tetäte ar s-ad-ässerādān telāmākt-nāsān iket-net. Lan dāx älḡadatān əjjootnen s-əlkamān sāl wi-dāx: ašəšdaj n-ikassān d-iḡsas d-iḡerān d-isəftaḡ.

⁵ Əssəstānān kāl-faris d-älḡulam n-Ättāwrāt Yīsa, ənnān-as: «Mafāl inəttulab wi-nāk, wār-əlkemān i-agna wa hanāḡ-dd-oyyān imārāwān-nānāḡ? Tattān wār-ässerādān ifassān-nāsān.»

⁶ Inn'-asän Yısa: «Älmunafexän! Tidət-däx a-wa fälla-wän innä ännäbi Saya,[†] a-s innä, inna Mässinäx:

⟨Tamətə-ta-hi, idlay-net ɣas

a-s hi-tässiimɣär

ulh-net, ujəj-ahi;

⁷ semɣar wa hi-jän äddinät, mälayäɣna ed

a-wa saɣren dägg-adəm fäll-i,

wär-ämoos ɣas ar färəðän dd-äxtasän i-iman-näsän.⟩

⁸ Emmək-wen-däx a-s, käwäneḍ-däx, təşläyäm i-alämär wa n-Mässinäx, tətṭäfäm älɣadät n-dägg-adəm.»

⁹ Inn'-asän daɣ: «Käwäneḍ, jərəm-in alämär wa n-Mässinäx, jəm agna-näwän däx-edägg-net.

¹⁰ Wädden, innä ännäbi Mosa:

⟨Səmyär ti-k d-ma-k⟩,

innä daɣ:

⟨Ere äbodärän ti-s meɣ ma-s, ämmätet.⟩

¹¹ Təssanäm s-a-wen-däx iket-net məšan käwäneḍ-da-däx, iyyäḍ däx-wän, saɣren äddinät a-s, ädoobät äwadəm ad-änn i-abba-net d-anna-net: ⟨A-wa s-äsidärhän ad-käwän-ədhələx sār-s, jex-t takute i-Mässinäx⟩,

¹² ija ɣur-wän a-s ere innän a-wen-däx i-imärawän-net, ad-äbas t-iwar älxaqq-näsän.

¹³ A-wa säɣrem d-a-äjjeen dər-s änifäqqän a-s hin-täsbätṭäläm a-wa inna Mässinäx, jəm a-wa hawän-inna agna-näwän däx-edägg-net.»

[†] **7:6 7:6** A-wa ännäbi dd-äzzarän i-Yısa, äloläy däx-isälan-net əssayät timaḍ n-awätay dat-tiwit-net.

14 Iyrä-dd Yisa tamøtte s-iman-net daḡ, inn'-as: «Säjdät-ahi iket-däḡ-näwän, tøjrahäm a-wa hawän-janneḡ:

15 Wär t-illa a itajjšän emm n-ägg-adəm äddooben asəmmädəs-net, a-wa dd-itəffalän ammas n-ulh-net ijänna s-emm-net a t-isamädəsän dat-Mässinäḡ.

[
16 Ere däḡ-wän ilän timəzzujen s-islä-däḡ, isäjdet.]»

17 Ifäl Yisa tamøtte ḡas, iqqäl ehän, əssəstänän-t inəṭṭulab-net dihen d-älmäḡna n-tangalt ta ija.

18 Inn'-asän: «Adiš käwäneḡ har ämära-däḡ, wär tøjrahäm a-s əsink, esäk? Ajän wär hönneyäm a-s, wär t-illa a isuk əwadəm emm-net äddooben a t-isəmmädəs

19 fäl-a-s, a-wa dd-itəffalän ajäma, wär-itəkk ulh-net, täsa-net a itakk, izjär darät-a-wen, äj'-e-hin däḡ-täkojt.» Emmək-wen-däḡ a-s isaxlal Yisa imənsiwän iket-näsän.

20 Inn'-asän daḡ: «A-wa dd-itəffalän ulh n-ägg-adəm, a t-isamädəsän dat-Mässinäḡ,

21 fäl-a-s ammas n-ulh n-ägg-adəm a dd-itəffal erk ənniyät wa n-abjənjən, iba n-täkrakiḡt, tikra, iji n-iman,

22 əzzəna, täkkärdädt, tälläbäst, amsud, asəmmädəs n-iman, erk derhan, asəkkufär, əkkəbru, taxxalen.

23 Entänəḡ-den-däḡ härätän wi samädəsnen ägg-adəm, ed ammas n-ulh-net a dd-təffalän.»

*Elle-s n-taməjart ta əzozäy Yisa
(Mätti 15:21-28)*

24 Ifäl Ƴısa dihen, ikkă teje ta n-Tir. Iwwăd-in Ƴas, ijjäŝ ehän iyyän, fäl-a-s wär irha ad-fälla-s əlmədän äddinät mäšan, hək-d-a-wen-dăƳ, wär-iŝter ass-net.

25 Ŗik-dăƳ a-s t-təslă tamădt tiyyät s-ih' alŝin elle-s, tək-k'-e-hi-dd, tärkăƳ data-s.

26 Tamădt-en, wär tăt-len käl-Ălyăhud, ti n-teje ta n-Finisya hăt äkall wa n-Surya. Tos'-e-hi-dd Ƴas, tət-tăr dăƳ-s ad-ikkəs alŝin dăƳ-elle-s mäšan,

27 inn'-as Ƴısa: «Ăyy aratän ad-ăyyăwănän təzzar ed, wär-ănhăjja ad-dd-ikkəs äwadəm amənsi daw-sän, ijăr-t-in i-ıyyădan.»

28 Tăwwežăb-as tamădt, tənn'-as: «ĂlƳalim, tidət mäšan a-wen wär hin-ikkəs a-s iyyădan, äddooben ad-tattän a-wa dd-sitrəkkin aratän.»

29 Inn'-as Ƴısa: «Əgləw, dăƳ-təssəba n-a-wa-dăƳ tənned, a fäl, elle-m, izjăr-tăt alŝin.»

30 Tăqqäl ehän-net, togăz-in elle-s, tənsa fäll-teŝejit, izjar-tăt alŝin.

*Ăzozăy Ƴısa ähaləs măzzəjăn s-ikras iləs-net
(Mătti 15:29-31)*

31 Ifäl Ƴısa teje ta n-Tir, ikka ta n-Săyda, ihăl ebre n-ejänŝ wa n-Galila dăƳ-a-s ijlay teje ta n-măraw iƳărman.

32 Əwwăyăn-dd săr-s äddinät ähaləs măzzəjăn s-ikras iləs-net ad-dăƳ-s tattărän ad-fälla-s isäns ifassän-net.

33 Irmăs-t-dd Ƴısa s-edes təzzar, ij' assəkăd-net dăƳ-timəzzujen-net, ijă daƳ s-assəkăd-net emătăm-net fäll-iləs n-ähaləs,

³⁴ äjožäy išənnawän, ähnäffät təzzar, inn'-as: «*Efata*», a-wen älmäḡna-net: «Marr.»

³⁵ Ämeränät timəzzujen-net hakd iləs-net, ad-itamäjräd.

³⁶ Äsmätär Ḳisa äddinät iket-näsän d-ad-wär jen isälan n-a-wen-däḡ i-äwadəm wäl' iyyän mäšan, a ikk' isamätar-tän, sawadän əntänəḡ däḡ-tənna n-a-wa ijän.

³⁷ Ämoos Ḳisa i-äddinät täkunt-i-däḡ mäqqärät, əqqälän-dd ḡas jannen: «A-wa, a-wa itäj iket-net ifran, isasla imžaj, isamäjräd daḡ wi s-əkräsän ilsawän-näsän.»

8

Äsyäwän Ḳisa əkkož afdän n-ähaləs (Mätti 15:32-39)

¹ Toläs-dd tamətte daḡ azəmmäḡ fäll-Ḳisa däḡ-išilan-win-däḡ. Inhäy a-s wär t-illa a təttaf təkšä ḡas, iḡrä-dd inəttulab-net, inn'-asän:

² «Naqq'-ahi tähanint n-tamətte-i-däḡ; a ilan käraḡ išilan, təlcam-ahi, äbas əttafan a əkšän;

³ afäl tän-əssəḡläḡ s-ihänan-näsän, ällužän s-əmmək-wa-däḡ, ad-hasän-indär ad-tän-in-awəḡän fäl iba n-äššahät ed, han-tän-i dd-falnen ijəj.»

⁴ Ənnän-as inəttulab-net: «Mi äddooben däḡ-tenere-ta-däḡ ad-išäkš tamətte jat əjut-wa-däḡ?»

⁵ Issəstän-tän Ḳisa, inn'-asän: «Maniket tijəlwen təttafam?» Ənnän-as: «Əssayät.»

⁶ Äşyāyma Yisa tamətte iket-net, idkāl tijəlwen ti n-əssayāt, ämmoy i-Mässināx, äfräsfäräs-tänāt təzzar, ikf'-enāt i-inəttulab i-ad-tänāt-užanän jer-äddināt; äžunän-tänāt.

⁷ Ekfän-t a-wa län dəx-imānan, idkāl-t, ämmoy i-Mässināx təzzar, ikf'-en i-inəttulab-net i-ad-tän-užanän jer-äddināt.

⁸ Təkša tamətte ta t-töllät dihen-dəx hundəx har təyyəwän. Äsdəwän-dd inəttulab a-wa dd-əjläšan äddināt, osän-t, idnay əssa deketän.

⁹ A iwwädän əkkož afdän n-ähaləs a ikšan ašäl-wen-dəx. Təkša tamətte xas, issəgl'-et Yisa; təglä.

¹⁰ Ijjäš ənta d-inəttulab-net turäft n-aman ässağāt-wen-dəx, əkkän tidbi ti hänen teje ta n-Dälmänuta.

*Irrum wa jän käl-faris i-Yisa
(Mätti 16:1-4; Luqa 12:54-56)*

¹¹ Osän-dd härät dəx-käl-faris Yisa, ämyännänän dər-s, tiirəmən-t, jannen-as: «Äj data-nəx iji n-Mässināx hanəx-issətbätän a-s tidət-dəx a-s Mässināx a kəy-dd-äšmašälän.»

¹² Ähnäffät dəx-iman-net, innä: «Mafäl tamməx əzzurəyāt-ta-dəx i-iji n-Mässināx? Äsidätteğ-awän a-s wär-ilkem ad-ija iji n-Mässināx wäl' iyyän data-wän.»

¹³ Ifäl-tän qarät-a-wen, oläs ujəš n-turäft n-aman, ijläy ejänš s-efäyy wa iyyädän.

*Äsmäqqa Yisa fäll-təmmətkit n-immun n-inəttulab
(Mätti 16:5-12)*

14 Däx-tekle-ten-däx, ətəwän-in inəttulab ad-awəyän äzzad, wär-əwweyän däx-turäft n-aman ar tiyyät tajəlla.

15 Äsmätär-tän Yisa, inn'-asän: «He käwäneđ! Ağəzät iman-näwän däx-täzza ta n-käl-faris d-Harudəs.»

16 Eslän inəttulab i-a-wen xas, ad-tinmənnin jer-iman-näsän: «A-wa, a-wa-däx s-wär nəwwey tijəlwen a fäl hanäx-itajj mäjräd-wa-däx.»

17 Ilmäđ Yisa xur-iman-net a-wa tinmənnin, inn'-asän: «Mafäl əkkan inəzjam-näwän a-wa s-wär täwweyäm tijəlwen? Ajän ulhawän-näwän jan täxart-ta-däx fäl äbas hannäyäm, äbas jarrähäm?»

18 Ma jänät tiṭṭawen-näwän tənheyäm sār-snät, ma jänät timəzzujen-näwän, təsləm sār-snät?

19 Ajän tətəwäm-in tijəlwen ti n-səmmosät äzunäx i-səmmos afdän n-ähaləs, maniket deketän dd-täsdäwäm däx-a-wa dd-təjläš tamətte?» Ənnän-as: «Märaw d-əssin.»

20 Inn'-asän: «Älwäqq wa d-äzunäx əssayät tijəlwen i-əkkoz afdän n-äwadəm, maniket deketän ədnaynen dd-təjläš tamətte?» Ənnän-as: «Əssa.»

21 Inn'-asän: «Adiš, har ämära-däx, wär t-illa a təjrahäm?»

Äzozäy Yisa emədderyəl iyyän däx-Bätsäyda

22 Iwwäd-in Yisa d-inəttulab-net tağrəmt ta n-Bätsäyda xas, ittəlwäy-dd sār-s emədderyəl iyyän, ətärän däx-s ad-t-idəs, izzəy.

²³ Irmäs-t Ƴisa s-äfuss, ilwäy-t hundäx har dār-s izjār tadäbayt təzzar, äswär tisutaf-net tiṭṭawen n-emədderxəl, äswär-t ɗarät-a-wen ifassän-net, inn'-as: «Ak, hannäyäd härät meḡ?»

²⁴ Äsfänäwnäw emədderxəl, innä: «Hannäyäx äddinät mäšan, olähän-ahi d-ihəşkan ärjaşnen.»

²⁵ Oläs Ƴisa asəwär n-ifassän-net tiṭṭawen-net xas, äsnäfläy ahänay, izzäy, oḡäd ahänay-net i-härät iket-net.

²⁶ Issəgl'-e Ƴisa, inn'-as: «Wär resäd wäla tadäbayt, aḡəd iman-näk xas s-ehän-näk.»

*Tajuhe ta ija Bəṭrus dəx-isälan n-Ƴisa
(Mätti 16:13-20; Luqa 9:18-21)*

²⁷ Izjār Ƴisa ɗarät-a-wen ənta d-inəṭṭulab-net, ikka dār-sän tidbi-ti hänen attayän n-aḡrəm wa s-itawänna Qäyşära wa n-Fəlibb. Əglan härwa a-s tän-issəstän Ƴisa, inn'-asän: «Ma jannen äddinät dəx-isälan-in? Ma jannen mi ämoosäḡ?»

²⁸ Äwwežäbän-as, ənnän-as: «Iyyäd jannen: käyy a-s Exya wa n-Enəsselmäḡ; iyyäd jannen: käyy a-s ännäbi Ƴəli; iyyäd fäw a jannen: käyy iyyän dəx-ännäbitän dd-olasän uḡəl.»

²⁹ Issəstän-tän daḡ, inn'-asän: «Käwänəḡ-ş, ma tənnäm, mi ämoosäḡ?» Äwwežäb-as Bəṭrus, inn'-as: «Käyy a-s Älmasex.»

³⁰ Äsmähäd dəx-sän Ƴisa ɗarät-a-wen, d-ad-wär jen isälan-win-däḡ i-äwadəm wäl' iyyän.

*Äloläy Ƴisa dəx-isälan n-tamättant-net
(Mätti 16:21-23; Luqa 9:22)*

31 Ƴur-dihen-däx ad-issəntä Ƴisa asəxär n-inəttulab-net n-a-s Ägg-ägg-adəm, ilzam-t ad-inhöy tersəmmawen äjjootnen, ənkārān-t inušāmān wi n-Işrayil d-imānokālān n-käl-tikutawen d-älxulam n-Ättäwrät; ad-əjən iman-net məşan, kərəđ işilan đarät taməttant-net, ad-dd-aləs tanākra jer-inəmmuttan.

32 Ij'-asān Ƴisa məjräd-wen-däx s-əmmək ilan ujreh; ikkäs-t-dd Bətrus s-takşe, äkläwlaw fälla-s.

33 Innäđ-dd Ƴisa s-inəttulab-net, ixtäl Bətrus, inn'-as: «Şənkəş fäll-i, Iblis-wa! Käyy, inəzjam-nāk, i n-dägg-adəm, wädden i n-Mässinäx.»

*Alkum i-Ƴisa Älmasesx
(Mätti 16:24-28; Luqa 9:23-27)*

34 Ixrä-dd Ƴisa đarät-a-wen tamətte d-inəttulab-net s-iman-net, inn'-asān: «Ere irhän alkum-hahi-däx, adiş, iksənet iman-net, äjet fäll-taməttant şund ta n-tajəttewt təzzar, ilkömet-ahi.

35 Ere wa wärän itəttär ar əmmək s-ogäz iman-net, däx-äddunya-ta-däx, ad-ifut däx-älzännät; məşan, wa irdän äfota däx-iman-net, däx-äddunya-ta-däx, däx-äddimmät-in, d-äddimmät n-Älənžil, ad-işləs.

36 Ma s-infa ägg-adəm ad-irbäx äddunya iket-däx-net, a-s ija a-wen, äfota däx-älaxärät?

37 Ajän ma t-illan s-äddoobät äwadəm ad-t-äkf i-ad-sär-s işləs iman-net däx-temse?

38 Ere hi-äkrakädän, näkk d-məjräd-in, dat-əzzurəyät-ta-däx n-temäznit tänmäşräyät

i-Mässināḡ, ad-t-əkrukəḍäḡ näkk-däḡ-i n-Ägg-ägg-adəm, ašäl wa d-mad-dd-iqqəl däḡ-älxurmät n-Abba-nin, äddew d-änjälösän wi n-iməššeddəjän.»

9

Tihusay n-älxurmät n-Ḣisa Älmasex

¹ Inn'-asän Ḣisa ḍarät-a-wen: «Äsidätteḡ-awän a-s han-käwän äddinät əbdadnen diha-däḡ wär-e iba wär-ənheyän Təmmənəya n-Mässināḡ tosa-dd s-əššahät.»

(Mätti 17:1-13; Luqa 9:28-36)

² Säḍis išilan ḍarät a-s inna a-wen-däḡ, iḡrä-dd Ḣisa Bəṡrus d-Yaqub d-Exya s-edes, ikka dār-sän taḍaxt tiyyät təḍkalät təzzar, ijjäš dihen ini äynayän data-sän;

³ ämläwläwän-dd imälsan-net, jän-dd təməlle s-käla wär-tätwänhäy fäll-ärori n-äkall.

⁴ Änfaläl-asän-dd dihen ännäbi Ḣəli d-ännäbi Mosa dd-falnen išənnawän, ad-tamäjrädän d-Ḣisa.

⁵ Iggäd-dd Bəṡrus, innä i-Ḣisa: «Älḡalim, ufa ad-nəzzäḡ ḡas diha-däḡ, ad-nəkrəs kərəḍ ihəktan: wa-näk, wa n-Mosa d-wa n-Ḣəli.»

⁶ Wär-issen a ijänna a-wa-däḡ has-ja tarəmməxt ənta d-imidiwän-net.

⁷ Təls'-en-dd tele n-tejäräkt tiyyät älwäqq-wen-däḡ, ifäl-dd emäsli išənnawän, innän:

«A-wa Rure-ḡ wa əkneeḡ tärha, säjdät-as!»

⁸ A-s dd-oläsän inəttulab aḍkul n-asəwəḍ-näsän, šanəšlamän siha d-siha, wär t-illa ere hannäyän edes-hasän kunta wädden Yisa ɣas.

⁹ Älwäqq wa dd-titrurun taḍayt, äsmähäḍ dəɣ-sän Yisa i-ad-wär jen isälan n-a-wa ənhäyän i-äwadəm wäl' iyyän hundäɣ har ašäl wa dd-mad-inkär Ägg-ägg-adəm jer-inəmmuttan.

¹⁰ Äsjädän i-a-wa hasän-inna, ad-tinməsəstinän d-älmäɣna n-tanäkra jer-inəmmuttan ed, iqqan a-wen iɣäfawän-näsän.

¹¹ Əssəstänän-t, ənnän-as: «Mafäl jannen äɣulam n-Ättäwrät a-s ännäbi Yəli a ilan s-a dd-ass təzzar, isrəy-t-dd Älmasex?»

¹² Inn'-asän: «Tidət, ännäbi Yəli a ilan s-a dd-ass isəssiɣəd härät iket-net; məšan, mafäl iktab a-s Ägg-ägg-adəm, ilzam-t ad-inhəy tersəmmawen äjjootnen, səffätṭən dəɣ-s dəgg-adəm?»

¹³ Ässiilmädäɣ-käwän a-s ännäbi Yəli, äru dd-osa, məšan äkkuddälän-t dəgg-adəm, jän-as a-wa s-ärhän ed, a-wen-däɣ a ənnän əlkəttabän dəɣ-isälan-net.»

*Äzozäy Yisa alyaq n-amälšon
(Mätti 17:14-21; Luqa 9:37-43)*

¹⁴ Älwäqq wa dd-iqqäl Yisa d-inəttulab-net wi n-kəraḍ, ogəzän-dd inəttulab-wi iyyädnen, ämmiizäɣän d-äɣulam n-Ättäwrät, täɣlay-tän tamətte.

¹⁵ Tojja tamətte Yisa ɣas, tof'-et təkunt, tošäl sär-s, ad-has-tajjän isofan.

¹⁶ Inn'-asän: «Ma tämmizäɣäm?»

17 Inn'-as ähaləs iyyän däx-tamətə: «Älxalim, əlwäyax-dd sär-k rure-x ih' alšin ikrasän iləs-net;

18 edägg däx-t irmäs-däx, ad-t-äjjädlät s-äkall, ad-isakäffaw, iziməkärkiz isenän, isaqäqqad; əttäräx däx-inəttulab-näk ad-däx-s t-əkkəsän mäšan, indär-asän.»

19 Äwwežab-asän, inn'-asän: «Ya əzzurəyät-i-däx wärät tomen, hundäx har əmme əllex jere-wän, əşbaräx-käwän? Awəyät-ahi-dd alyađ.» Äwwäyän-as t-dd.

20 Diha-däx d-inhäy alšin Yisa, ad-ijjädlat alyađ s-äkall, ad-itişbärdil, isakäffaw.

21 Issəstän Yisa ti-s, inn'-as: «Əmme t-irmäs a-wa?» Inn'-as ähaləs: «Härwa mädrəy,

22 dehiyyän fäw, itəjjar-t alšin däx-efew mex däx-aman i-ad-ämmät. Yas, kunta täddoobed härät däx-a-wa-däx, ađən-anäx tähanint, agəz-anäx.»

23 Inn'-as Yisa: «Tənned: <kunta täddoobed!> Əlməd a-s wär t-illa a-s wädden räqqiis i-amumən.»

24 İdkäl ti-s n-alyađ eməsli-net älwäqq-wen-däx, innä: «Omanäx, agəz-ahi däx-iba n-immun.»

25 İnhäy Yisa tamətə toşal-dd sär-s yas, äsmähäđ däx-alšin, inn'-as: «Alšin wa ikrasän iləs n-alyađ-i-däx, äzimäzzäj-t; omaräx-käy s-ad-t-təzjərəđ, wär-iläkkämet ad-t-dd-täqqaläd.»

26 Äxwättät alšin, ibbəkək alyađ s-əşşahät təzzar, izjər-t; äktäyyät alyađ har äxelän äddinät äba-t

²⁷ məşan, irmäs-t-dd Ƴisa s-äfuss, issenkär-t-dd, ibdäd fäll-iman-net.

²⁸ Ƴıqqälän ehän Ƴas, əssöstänän inəttulab Ƴisa s-edes, ənnän-as: «Alšin-wənnin-hi, mafäl hanäƳ-indär ad-t-nökkəs dəƳ-alyađ?»

²⁹ Inn'-asän: «Alšin şund-wa, wär t-ill' əmmək s-izjär ar s-tamädilt n-MässinäƳ.»

Əsihe wa s-əssin d-itajj Ƴisa isälan n-taməttant-net d-tanäkra-net
(Mätti 17:22-23; Luqa 9:43-45)

³⁰ Fälän dihen Ƴas, ällilän teje ta n-Galila məşan, wär-irha Ƴisa ad-sär-s ilməd əwadəm

³¹ ed isaxra inəttulab-net, ijann'-asän: «Ägg-ägg-adəm, ad-ättärmäs, ijješ ifassän n-dägg-adəm, əjən iman-net məşan, kərađ išilan qarət taməttant-net, ad-dd-inkär jer-inəmmuttan.»

³² Wär-əjrehän məjräd-wen-dəƳ, h'-en daƳ tasaja n-ad t-söstənän d-älməƳna-net.

Tərha n-mijraw

(Mätti 18:1-5; Luqa 9:46-48)

³³ Ƴıwwäđän-in Qäfärnaxum, əjjäşän ehän wa əkkän Ƴas, issöstän Ƴisa inəttulab-net, inn'-asän: «Ma tämmizəƳäm dəƳ-tabarət?»

³⁴ Wär t-illa a has-ənnan. Ij'-asän asəstan-wen-dəƳ, fäl-a-s, dəƳ-tekle-näsän, ämmiizəƳän jer-iman-näsän i-ad-əlmədän əndek dəƳ-sän wa ojärän.

³⁵ Äqqima Ƴisa Ƴas, iyrä-dd inəttulab-net wi n-məraw d-əssin s-iman-net, inn'-asän: «Wa dəƳ-wän irhän täzert, iməlet daw-imidiwän-net, umaset-asän akli.»

³⁶ Irmäs darät-a-wen ara iyyän, ij'-e jere-sän təzzar, idkäl-t dəx-ifassän-net, inn'-asän:

³⁷ «Ere äsbälälän ara šund wa-däx, dəx-təssəba-nin, näkk a äsbäläl; ere wa hi-äsbälälän, wädden näkk a äsbäläl, Wa hi-dd-äšmašälän a äsbäläl.»

(Mätti 10:42; Luqa 9:49-50)

³⁸ Inn'-as änätalib wa s-isəm-net Exya: «Älyalim, nənhay ähaləs itakkäsän alšinän dəx-äddinät s-tärna n-isəm-näk, nənn'-as, wär-itiləset, ed wär där-näx äddew.»

³⁹ Inn'-asän Yisa: «Wär has-t-təgdeläm, fäl-a-s, wär t-illa ere madän-äj iji n-Mässinäx s-tärna n-isəm-in aləs daχ, a əndärrän darät-a-wen, tizmit-in.

⁴⁰ Ere wärän hanäx-iknes, a-di, amidi-nänäx.

⁴¹ Ere kəwän-issəswän kara n-aman, dəx-təssəba n-a-wa s-Älmasex a kəwän-ilän, äsidättey-awän a-s ilkam, ad-ijrəw, älhäk n-emärked wa ija.»

Wär tumasät əssəbab n-tanməšrayt i-äwadəm

(Mätti 18:6-9; Luqa 17:1-2)

⁴² «Aratän wi šär-i omännən, ere ämoosän əssəbab n-tanməšrayt i-wäla iyyän dəx-sän-dəx, äwadəm-en, iššäm-as-in, ad-tətwäqqən tähünt ta mäqqärät s-itəzzad älkäma dəx-err-net, itwəjar-in dəx-ider n-əjärew wa səmmän härwa wär-ofa abäkkad-wen-dəx.

⁴³ Käyy, kunta äfuss-näk a äbokän ad-hak-ässäbäb s-abäkkad, itidärrut-käy, ənkäd-t-in

härwa wär tämešäläd abäkkad-wen-däx ed uf'-ak, ad-jeed äfuss, tøjješäd älzännät, uhən, ad-leed əssin ifassän, tətwejäräd-in däx-efew wa n-žohännäma wärän itəməkit [

⁴⁴ d-tiwəkkawen ti wären təmöttit s-härkuk əfradnät däx-tixəswen n-äddinät].

⁴⁵ Kunta dax ađar-näk a äbokän ad-käy-sidəw däx-abäkkad, itidärrut-käy, önkäd-t-in härwa wär tämešäläd abäkkad-wen-däx, ed uf'-ak, ad-tøjješäd älzännät, jeed ađar, uhən ad-leed əssin idarän, tətwejäräd-in däx-efew wa n-žohännäma-i hänät [

⁴⁶ tiwəkkawen ti wären təmöttit s-härkuk əfradnät däx-tixəswen n-äddinät].

⁴⁷ Kunta dax tiŧŧ-näk a äbokän ad-käy-sidəw däx-abäkkad, tidärrut-käy, kukkəret-tät-dd härwa wär tämešäläd abäkkad-wen-däx, ed uf'-ak, ad-tøjješäd Təmmənəya n-Mässinäx jeed tiŧŧ, uhən ad-leed sänatät tiŧŧawen, tətwejäräd-in däx-efew wa n-žohännäma.

⁴⁸ Dihen, tiwəkkawen ti əfradnen däx-tixəswen n-äddinät, əddarnät härkuk.

Tangalt ta n-tesəmt

(Mätti 5:13; Luqa 14:34-35)

⁴⁹ Ere ämešälän abäkkad, ad-ijješ efew s-əmmək-wa-däx s-tajjš tesəmt imənsiwän i-ad-tän-tøjješ temde.

⁵⁰ Tesəmt, härät olayän mäšan, afäl tät-təjmäd temde, ma tät-e-isəsməmän? Tumaset tämudre-näwän a ha tesəmt, tənhirejäm däx-älxafyät.»

10

Aməzzi d-iba-net (Matti 19:1-12; Luqa 16:18)

¹ Ifäl Yisa dihen, ikkä teje ta n-Älyähudəyät d-illa-hin i-ejänš wa n-Ÿurdəni, təlkaḍ-as-dd tamətte tajeet, ad-isayra day äddinät, s-əmmək wa s-izzäy ad-t-äj.

² Osän-t-dd härät dəḡ-käl-faris, orämän-t s-asəstan iyyän i-ad-änn a wärän itətwənn, ənnän-as: «Dəḡ-a-wa innä alämär-nänəḡ, ak ajän xälal i-ähaləs ad-izəmməzzəy hənne-s?»

³ Inn'-asän Yisa: «Ma dər-kəwän-əsmätär ännäbi Mosa.»

⁴ Ənnän-as: «Ännäbi Mosa, ijraw i-ähaləs ad-äkf təkərde n-aməzzi i-hənne-s təzzar, izəmməzzəy-tät.»

⁵ Inn'-asän Yisa: «Alämär wa hawän-iktäb ännäbi Mosa, iktäb-awän-t dəḡ-təssəba n-təḡart-i jän ulhawän-nəwän,

⁶ ənnär wädden a-wen:

<S-tizarät a-s dd-ixläk Ämaxlak äddunya, ähaləs d-tamäḍt a dd-ixläk,

⁷ təssəba n-a-wen-dəḡ a fäl mad-ifəl ähaləs ti-s d-ma-s,

irtəy d-hənne-s,

⁸ umasän fäll-əssin-essän tiyyät taḡəssa,

ad-äbas ämoosän əssin äddinät,

ämoosän tiyyät taḡəssa.>

⁹ Ҳas, a-wa osəḡ Mässinəḡ, wär t-ibəḍḍəwet ägg-adəm.»

¹⁰ Iqqäl-dd Yisa ehän ḡas, əssətänän-t inəṭṭulab-net d-älməḡna n-a-wa innä.

11 Inn'-asən: «Ere hin-əzməzzäyän hənne-s, oläs adubən n-iyyät, izna,

12 tamädt day təbdät d-əhaləs-net, toläs adubən n-iyyän, təlmədet a-s, təzna ənta-däx.»

Ija Yisa əlbəraka dəx-aratän
(Mätti 19:13-15; Luqa 18:15-17)

13 Əlwäyän-dd äddinät aratän s-Yisa i-ad-däx-sän əj əlbəraka, məšan, əkläwläwän inəttulab-net fäll-imalwayän-näsän.

14 İnhäy Yisa a-wa tən-işlän xas, əkmənt-iman-net, inn'-asən: «Äyyät aratän ad-hidd-əkkən, wär tən-in-təwweçäm fäll-i fäl-a-s, Təmmənəya n-Mässinäx, äddinät wi dər-sän ənifəqqänen a-s tət-ihakk.

15 Äsidätteç-awän a-s ere wärän iqbel Təmmənəya n-Mässinäx s-əmmək wa s-tətmad-iqbəl ara, wär tət-mad-ijjəş.»

16 Äşyäyma çarät-a-wen aratän fäll-ifaddän-net, əswär-tən ifassän-net, ijä dəx-sän əlbəraka.

Äddunya mey əlaxərät?
(Mätti 19:16-22; Luqa 18:18-23)

17 Əlwəçq wa d-əbok Yisa ad-ifəl edəgg-en, oşäl-dd sər-s əhaləs iyyän, irkəx data-s, inn'-as: «Əlyalim wa oläxän, ma s-əleç s-ad-t-əjəx i-ad-əkkusəx təmudre ta təylälät?»

18 Inn'-as Yisa: «Mafäl hi-janned wa oläxän? Wär t-illa ere olaçän säl Mässinäx,

19 wädden, təssanäd aləmərän-net: Wär jed iman, wär jed əzzəna, wär tokeräd,

wär täjjəyhäd s-bahu, wär təðlemäd äwadəm, səmɣär ti-k d-ma-k.»

²⁰ Inn'-as ähaləs: «Älyalim, härätän-win-däx, äɣdaläx-asän härwa ämoosäx ara.»

²¹ Ikn'-e Ƴisa azəjjəzz, ijräz-as, inn'-as: «Härät iyyän a hak-in-äba: əgləw, tužžär-in a-wa leed, təkfəd-t i-tiläqqiwen i-ad-təkrəšäd ärrəzäx däx-älžännät; dihen, əqqəl-dd, əlkəm-ahi.»

²² Isl' ähaləs i-mäjräd-wen-däx ɣas, innäd, ənxasän iman-net, ed il' ehäre n-tikunen.

Ärrəzäx wa n-tidət

(Mätti 19:23-30; Luqa 18:24-30)

²³ Issäxläy-dd Ƴisa tamətte akäyad-net, innä i-inəttulab-net: «Ažwi ija i-wi ärzäxnen uješ n-Təmmənəya n-Mässinäx.»

²⁴ Inhäy a-s iqqan a-wen iɣäfawän n-inəttulab-net ɣas, inn'-asän dax: «Ilyadän-in, ažwi ija uješ n-Təmmənəya n-Mässinäx!

²⁵ Ojär täräxse ta ija ad-ijjəš amnəs s-titt n-änazmay uhən, ad-ijjəš ere irzaɣän Təmmənəya n-Mässinäx.»

²⁶ Iknä mäjräd-wen-däx uɣən n-iɣäfawän-näsän, ad-tinmənnin: «Adiš mi madän-iɣləs?»

²⁷ Issəjräh-tän Ƴisa, inn'-asän: «A-wen, dagg-adəm wär t-äsmäkkänän mäšan Mässinäx ənta, äddoobät-t ed, wär t-illa a has-indarän.»

²⁸ Inn'-as Bətrus darät-a-wen: «Älyalim, näkkäneđ, wädden noyyä a-wa nəla iket-net, nəl käm-ak.»

²⁹ Inn'-asän Yisa: «Äsidätteḡ-awän, a-s, wär t-illa ere madän-ifəl ehän-net d-ayətma-s d-šätma-s d-ma-s d-ti-s d-aratän-net d-ihärawän-net dāḡ-äddimmät-in, d-äddimmät n-Älönzil

³⁰ s-wädden ad-ijrəw dāḡ-äzzäman-wa-dāḡ s-temede n-anəḍfus ihänan, ayətma, šätma, matte, aratän d-ihärawän äddewnen d-älɣizabät, ijrəw daḡ tämudre täɣlalät dāḡ-tilkamät.

³¹ A äjjeen dāḡ-wi äzzarnen ašäl-i-dāḡ, ad-ijjəš ajilal, a äjjeen dāḡ-wi hänen ajilal ašäl-i-dāḡ, ad-izar.»

Äsihe wa s-käraḍ d-itajj Yisa isälan n-tamättant-net d-tanäkra-net
(Mätti 20:17-19; Luqa 18:31-34)

³² Ijjäš Yisa ḍarät-a-wen eyäf n-tamətte, irmäs tamdujt ta n-Yärußälam, äššiwwäšan inəṭṭulab-net, wär ozja ənniyät n-wi has-əlkammen. Ikkäsd-d inəṭṭulab wi n-märaw d-əssin s-takše, ad-hasän-itajj isälan n-a-wa t-madän-irməs,

³³ inn'-asän: «Ənhəywät, näkkäneḍ-da-hi əkkänen Yärußälam-i-dāḡ mad-ättärmäs Ägg-ägg-adəm, ijjəš ifassän n-imänokalän n-käl-tikutawen d-älɣulam n-Äṭṭäwrät, ad-t-sidəwän dāḡ-äššäreḡa-näsän, äḡtəsän-as tamättant təzzar, əjən-t jer-ifassän n-inəzzulam,†

³⁴ i-ad-t-əjən tekäškäšt, sutəfən fälla-s, əjən dāḡ-s tiwit, əjən iman-net mäšan, ašäl wa

† **10:33 10:33** — ɣur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-dāḡ a fäl tiwsaten ti iyyäḍnen iket-näsnät, ti n-inəzzulam. — Ašäl-i-dāḡ, änəzzalim, äkafär (ere wärän issen s-Mässinäḡ).

s-kärad ɗarät tamättant-net, ad-dd-inkär jer-inəmmuttan.»

*A-wa ətärän däg-Zäbdi dāy-Ÿisa
(Mätti 20:20-28)*

³⁵ Ohäzän-dd däg-Zäbdi, Yaqub d-Exya Ÿisa, ənnän-as: «ÄŸalim, närha ad-hanäŸ-təjəd a-wa dāy-k mad-nəttär.»

³⁶ Inn'-asän: «Ma s-tärham ad-hawän-t-äjäŸ?»

³⁷ Ənnän-as: «Äkf'-anäŸ ad-äqqayəm iyyän dāy-näŸ daw-aŸil-näk, äqqayəm wa iyyädän daw-täšalje-näk i-ad-numas wi sär-k oräknen dāy-älxikmät, afäl dd-täqqäläd dāy-älxurmät-näk.»

³⁸ Inn'-asän Ÿisa: «Käwäneɗ, wär tössenäm a dār-sästanäm. Ajän näkk, kara n-tisnant wa mad-äswäŸ, täddobem tesäse-net, meŸ daŸ, ajän täddoobem härät i-tamättant ta mad-äjäŸ?»

³⁹ Ənnän-as: «Näddoobät-t.» Inn'-asän Ÿisa: «Tidət lab a-s ad-təswəm kara n-tisnant wa mad-äswäŸ, təjəm tamättant ta mad-äjäŸ

⁴⁰ mäšan, dāy-isälan n-tayimit daw-aŸil-in d-täšalje-nin, wädden näkk a ihakkän a-wen; MässinäŸ a t-ihakkän i-wi s-t-itwär.»

*Mijraw wa n-tidət
(Mätti 20:24-28; Luqa 22:24-27)*

⁴¹ Əslän inəttulab wi n-märaw i-a-wen Ÿas, ijjäš-tän älhäm fäll-Yaqub d-Exya.

⁴² İyr'-en-dd Ÿisa iket-näsän s-iman-net, inn'-asän: «Tössenäm a-s imänokalän n-tiwsaten, äxkamän fälla-snät s-äşşahät; käl-əlxəkum daŸ, wär lämmedän fäll-käl-äkall

⁴³ məšan, kəwəneḍ, wər jem a-wen; wa dəx-wən irhən mijraw, umaset akli n-imidiwən-net təzzar,

⁴⁴ ere dəx-wən irhən daḡ təzert i-imidiwən-net, umaset akli-nəsən təzzar.

⁴⁵ Ägg-ägg-adəm, wər dd-ämešäl i-ad-has-äxdəmən äddinät, änn-ak, ämešäl-dd i-ad-ixdəm ənta iman-net, äkf təmudre-net i-ad-isəddärfət äddinät äjjootnen.»

Emədderyəl wa äzozäy Ƴisa
(Mätti 20:29-34; Luqa 18:35-43)

⁴⁶ Əgłan har hin-əwwäḍän taḡrəmt ta n-Žärriko. Älwäqq wa dd-izajjār Ƴisa d-inəṭṭulab-net taḡrəmt-ten-däḡ, təlkam-asən tamətte täjjeet. Zäbo wa dd-jän, äqqiima emədderyəl s-isəm-net Bärtima ägg Tima dəx-asälim-net, itattär takute dəx-äddinät.

⁴⁷ Islä a-s Ƴisa wa n-Näširät a okayän ḡas, äşḡärät, innä: «Ya Ƴisa wa n-Ägg Dawəd, aḍən-ahi tähanint!»

⁴⁸ Äxtälän-t äddinät i-ad-hin-isusəm məšan, äşḡärät s-afälla: «Ya Ägg-Dawəd, aḍən-ahi tähanint.»

⁴⁹ İbdäd Ƴisa, innä: «Elwəyät-ahi-t-dd.» Elwayän-as-t-dd, jannen-as: «Əhəl iman-näk, iḡarr'-ik.»

⁵⁰ İjār-in emədderyəl abärnuş-net dihen, iggäd s-ıyyät, ikka Ƴisa.

⁵¹ Os'-e-hi-dd ḡas, inn'-as Ƴisa: «Ma s-tärhed ad-hak-äjäḡ?» Inn'-as emədderyəl: «Äḡalim, aləsäḡet ahänay.»

⁵² Inn'-as Ƴisa: «Egləw, əzozäy-käy immun-näk.» Oläs Bärtima ahänay älwäqq-wen-däx, ilkäm i-Ƴisa.

11

*Ujš n-Ƴisa i-ayrəm wa n-Yärußälam
(Mätti 21:1-11; Luqa 19:28-40; Exya 12:12-19)*

¹ Ohäz-in Ƴisa d-inəttulab-net Yärußälam, ih' ämära taxrəmt ta n-Bätfazi, edes i-tadəxt ta täsiätät ihəşkan wi n-əzzäytun. Ƴur-dihen-däx, ad-äşmaşäl əssin däx-inəttulab-net,

² inn'-asän: «Äkkät tadäbayt ta n-data-wän, däx-ujš-näwän-has, ad-təjrəwäm äza ojayän s-käla wär t-iney äwadəm, arät-t-dd, təlwəyäm-t-dd.

³ Ere hawän-innän, mafäl t-tirəm, ännät-as: <Älyalim a däx-s ilan əşşəxəl, ässimda dār-s Ƴas, nəssoxäl-awän-t-dd.> »

⁴ Eglän inəttulab wi n-əssin, əjrəwän äza ojayän däx-təşarrit dat-əmm n-ehän iyyän, orän-t-dd.

⁵ Ənnän-asän äddinät t-əllanen dihen: «Mafäl tirəm äza?»

⁶ Äsoxälän-asän a-wa hasän-inna Ƴisa, oyyän-tän, orän-t, əglän dār-s.

⁷ Əlwəyän-dd äza i-Ƴisa, əstäjän-as isəlsa-näsän, inäy-t.

⁸ Ad-fattäx təşşəm n-äddinät isəlsa-näsän fäll-tabarät, Ƴattäsän-dd wi iyyädnen ilədledän däx-ihəşkan, fattäxän-tän fäll-tabarät,

⁹ äsiyəren wi has-əzzarnen hakd wi has-əlkammen, jannen: «Ozana!

Näkfet Mässināx semḡar!
 Ija Mässināx älbāraka
 dāḡ-wa dd-osän dāḡ-isəm n-Emäli,
¹⁰ irxäm Mässināx Təmmənəya
 ta s-ija ärkāwāl-net i-abba-nānāḡ Dawəd.
 Ozana i-Mässināx wa iknän aḡkul.»

¹¹ Iwwäd-in Ḡisa aḡrəm wa n-Yārussālam,
 ijjāš ehän n-ämudd wa mäqqārän, äzjäzz'-e iket-
 net; inhäy a-s ija fälla-s ehäd ənta d-inəṭṭulab wi
 n-māraw d-əssin ḡas, ikkä dār-sän tadābayt ta n-
 Bitanya.

Ašar wa ilyän Ḡisa
(Mätti 21:18-19)

¹² Äffaw, a-s dd-izjār tadābayt ta n-Bitanya,
 älluz.

¹³ Ojja ahəšk s-isəm-net ašar inšarän, ikk'-e-
 hi-dd, itassän warän-t aratän mäšan, wär fälla-s
 ijrew ar ifärketän ed, wär-ija äzzāman n-tirwe-
 net.

¹⁴ Innä i-ašar: «Wär-issəlkäm Mässināx ad-
 torawäd har tənkar äddunya.» A-s innä a-wen-
 dāḡ, sallän-as inəṭṭulab-net.

Ikkäs Ḡisa käl-mamāla dāḡ-ehän n-ämudd wa
mäqqārän
(Mätti 21:12-17; Luqa 19:45-48; Exya 2:13-22)

¹⁵ Ewwädän-in Yārussālam, ijjāš Ḡisa ehän n-
 ämudd wa mäqqārän, ad-dāḡ-s isattāḡ ättužžar
 d-imäžänšan-näsän, isibräḡwil tisəskar n-käl-
 amähaš n-izärfan d-tisäqqima n-ättužžar n-
 tidäberən.

16 Wār-oyy' āwadəm wāl' iyyān āwwayān a inazzān āttužžār-t dāḡ-ehān n-āmudd wa māqqārān.

17 Isayrā āddināt, ijann'-asān: «Ajān wādden iktab a-s, innā Māssināḡ:

⟨Ehān-in ad-umas ehān n-āmudd i-tiwsaten iket-dāḡ-nāsnāt,⟩

māšan kāwāneḡ, jān-t tajnut n-imākrāḡān.»

18 Ʒslān imānokālān n-kāl-tikutawen d-ālḡulam n-Āṭṭāwrāt i-a-wen ḡas, ad-tattārān əmmək s-jān iman-net māšan, wār helān a-wen, fāl-a-s āmoos a-wa isāḡra, a itəḡḡasān ulhawān n-tamətte, ijraz-as iket-net.

19 Ij' alməḡ ḡas, izjār Ʒisa d-inəṭṭulab-net aḡrəm.

A-wa isadabat immun
(Mātti 21:20-22)

20 Āffāw, əkkān-dd edes i-ašar-wənnin, ənhāyān-t āqqur har ikewān-net.

21 Iktā-dd Bəṭrus a-wa ijān ḡas, innā i-Ʒisa: «Āḡalim, ənhəy-t-ak ašar wa təḡḡānād, āqqur-in.»

22 Āwwežāb-asān Ʒisa, inn'-asān: «Amənāt s-Māssināḡ,

23 āsidātteḡ-awān a-s ere dāḡ-wān innān i-aḡaḡ-wa-dāḡ: ⟨Haan, təjrəd iman-nāk dāḡ-əjānš wa səmmān, ija a-wen, dāḡ-a-s, wār-ij' āššāk dāḡ-ulh-net, iflas s-a-wa innā ad-āj, ad-ijrəw ḡur-Māssināḡ a-wa dāḡ-s ittār.

24 A-wen-dāḡ a fāl hawān-janney a-s, a dāḡ-dālām Māssināḡ-dāḡ, dāḡ-a-s təflasām a-s ad-t-təjrəwām, ad-hawān-t-ākf.

²⁵ E-d tēbdādām-dāḡ i-ad-tēdlēm Mässināḡ har dd-tēktām a-s iḡšad-awān āwadēm hārāt, ānšāt-as-in ed, afāl jān a-wen, ad-hawān-in-ānš daḡ Abba-nāwān Mässināḡ-i ihān išēnnawān erk imojjan-nāwān. [

²⁶ Afāl wār nēššēm i-āddināt, wār hawān-in-e-ānš Abba-nāwān Mässināḡ-i ihān išēnnawān ibākkaḡān-nāwān.]»

Äšmäšäkken imānokālān n-kāl-tikutawen tārna n-Ÿisa

(Mätti 21:23-27; Luqa 20:1-8)

²⁷ Olās-dd Ÿisa uḡel n-Ÿārussālam ēnta d-inēṭṭulab-net ḡas, issāḡlāy-dd dāḡ-ehān n-āmudd wa māqqārān. Osān-t-dd imānokālān n-kāl-tikutawen d-ālḡulam n-Äṭṭāwrāt d-inušāmān n-Iḡrayil,

²⁸ ēnnān-as: «Mi kay-ikfān turhajāt n-amišel n-tikunen-ti-dāḡ? Mi kāy-ikfān tārna-ta-dāḡ s-tājjād a-wa tājjād?»

²⁹ Inn'-asān Ÿisa: «Ad-hawān-ājāḡ nākk-dāḡ asēstan iyyān; wažābāt-ahi ḡas ad-hawān-ällāḡeḡ nākk-dāḡ ere wa hi-ikfān turhajāt ta s-tamašālāḡ a-wa tājjāḡ.

³⁰ Asēstan-in da: Mi dd-äšmašālān Exya wa n-Enēsselmäḡ i-ad-isēlmāḡ äddināt dāḡ-aman? Ak Mässināḡ meḡ dāgg-adēm ḡas?»

³¹ Inn'-asān a-wen ḡas, ēqqālān-dd ämmiizāḡān jer-iman-nāsān, jannen: «Afāl has-nēnna: <Mässināḡ a t-dd-äšmašālān>, ad-hanāḡ-änn: <Adiš, mafāl wār tomenām s-a-wa hawān-inna.>

³² Afāl has-nēnna daḡ dāgg-adēm, aaa...» Wār helān tēnna n-a-wen, ed äksuḡān, ad-fälla-sān

tiðəw tamətte-ta-däx ed təkkaş iket-net äşşäk a-s, Exya, ännäbi n-Mäşsinäx s-tidət a ämoos.

³³ Ğnnän-as: «Wär nəssen.» Inn'-asän: «Adiş, näkk-däx wär hawän-e-älläxex ere wa hi-ikfän tärna ta s-täjjäx a-wa täjjäx.»

12

Isälan n-inaxdimän wi n-inälläbäsän (Mätti 21:33-44; Luqa 20:9-18)

¹ Issäyläy Yisa daş tangalen tiyyäð tamətte. Ij'-asän tiyyät däx-hasän-innä: «Käla t-illa ähaləs äddomen aşəkrəş n-läxnäb, ij'-as afäraj, ijä däx-s edägg wa däx-içimməw läxnäb, idäy däx-s edägg n-soro i-ämagaş-net; ifär-t ðarät-a-wen i-inəsduma iyyäð təzzar ikk' äkall iyyän.

² Iwwäð-dd äzzäman n-amili n-aşəkrəş şas, äşmaşäl-dd äanaxdim-net s-inəsduma i-ad-has-dd-awəy şur-sän folät-net däx-a-wa dd-oräw aşəkrəş.

³ Os'-en-dd äanaxdim, ärmäsän-t, tithəkkin-t har t-əksänän təzzar, əssəglän-t koräyräy.

⁴ Äşmaşäl-dd sär-sän daş äanaxdim iyyän, äşfätäqqen eşäf-net, äsmäðräyän-t.

⁵ Oläs daş aşəmmişəl n-iyyän, ärmäsän-t ənta, änyän-t kərəf; issəlkäm-asän-dd-i äjjootnen, äsmäðräyän aşil-näsän, jän iman n-aşil wa iyyäðän.

⁶ Wär has-dd-äqqima ðarät-a-wen ar ad-sär-sän dd-işəmmişəl rure-s ikna tärha ed inna däx-iman-net: <Ənta ya şämad rure-ş, änihäjja s-ad-t-səmyärän>.

⁷ mäşän ənhäyän-t inəsduma imal-dd şas, änmännän: <Ənhəywät-ak, amäkkasu-net;

öyyäwät, närmöset, näjet iman-net i-ad-tumas takäsit ti-nänäx>;

⁸ ärmäsän-t, änyän-t kərəf təzzar, jārān-t-in qarāt ašəkrəš.»

⁹ Issəmdä Yisa tangalt xas, inn'-asän: «Äs-siistänäx-kāwān, ma mad-āj mäs-si-s n-ašəkrəš ämära? Eḏmanäx-awān a-s ad-dd-ass ənta iman-net, ilhəs inəsduma-wi-däx təzzar, aləs tefert n-ašəkrəš-net i-iyäd.»

¹⁰ Inn'-asän daḡ: «Ajän wär täxrem däx-əlkəttab n-Mässinäx a-s:

<Tähunt ta hin-jārān älbännatän s-ənnän wär tənfa härät,

ənta a-s a-s təšräy tanfust,

tämoos tähunt ta tufät n-aḡmār hakkät äššahät ehän;

¹¹ a-wen Emäli a t-ijän i-ad-umas

täkunt dat-tiṭṭawen-nänäx.> »

¹² Issəmdä Yisa tənna n-a-wen xas, ad-tattārān imänokalän n-käl-tikutawen d-älḡulam n-Äṭṭawrät d-inušämän n-Išrayil əmmək s-t-ästärmäsän ed əssanän a-s əntāneḏ-en-däx a ässiixläy tangalt-ta-däx mäšan, wär helän a-wen fäl tuksəḏa-i jän i-tamətte; əšläyän-as, əglän.

*Isālan n-tiwse i-Qäyşär wa n-ämānokäl
(Mätti 22:15-22; Luqa 20:20-26)*

¹³ Äšmašälän-dd sār-s qarāt-a-wen härät däx-käl-faris d-härät däx-käl-Harudəs i-ad-has-əqqənän tändərbat, siḏəwən-t däx-a inna wārān itətwinn.

14 Osän-t-dd, ənnän-as: «Älyalim, nəssan a-s tidət ɣas a janned, wär täkkuläd däɣ-a-wa jännən äddinät, wär tän-täzmäzläyäd, wär säɣrid daɣ ɣas ar tidət n-tabarät n-Mässinäɣ. Ämära, nässiistän-käy: ak iwar-anäɣ ad-nəzəl tiwse i-ämänokal Qäyşär meɣ? Näzlet-tät meɣ?»

15 Ilmäd Yisa ɣur-iman-net s-təlmənufäɣa ta t-təllät ɗarät asəstan-näsän, inn'-asän: «Mafäl hi-tižarrubum? Awəyät-ahi-dd ärriyal n-azrəf-näwän har t-ənhəyäɣ.»

16 Äwwäyän-as-t-dd, inn'-asän: «Mi ilän ättäşwer d-isəm wa t-iwärän?» Ənnän-as: «I n-ämänokal Qäyşär.»

17 Inn'-asän: «Adiš, suɣəlät i-ämänokal wa mäqqārän a-wa fälla-wän ila, təkfəm daɣ Mässinäɣ a-wa fälla-wän ila.» Əqqälän-dd ɣas, tof'-en täkunt n-älwižab-wa-däɣ hasän-ija.

*Äwwežäb Yisa däɣ-isälan n-tanäkra jer-inəmmuttan
(Mätti 22:23-33; Luqa 20:27-40)*

18 Osän-t-dd ɗarät-a-wen härät däɣ-käl-sadus-i ɣur-ija a-s wär təkem tanäkra n-inəmmuttan, əssəstänän-t, ənnän-as:

19 «Älyalim, inn'-anäɣ ännäbi Mosa: «Afäl äba äñña-s n-äwadəm, oyyä-dd hännə-s dār-wär oher ara, idubənet-tät äñña-s i-ad-ikreš əzzurəyät i-äñña-s wa äba i-ad-wär hin-itiləm isəm n-wa äba fäll-ärori n-äkall.

20 Ämära, əkkəs-anäɣ däɣ-täqqän n-eyäf: käla t-əllan əssa ayətma; ädobän däɣ-sän wa n-amäqqar mäšan, äba-t wär-ikreš ara.

21 Oyyä-dd hänne-s, ädobän-tät wa s-əssin, äba-t ənta-däx wär dd-oyya ara, a-wen-däx daḡ a ija wa s-käraḡ;

22 äba-tän əssa-essän mäšan, wär tän-iha i dd-oyyan ara; äba daḡ tamäḡt ḡara-sän.

23 Nässiistän-käy: ašäl wa n-tanäkra jer-inəmmuttan, əndek däḡ-sän wa s-e-tumas hänne-s ed, ənhayän-tät adubən əssa-essän?> »

24 Inn'-asän ʿİsa: «Ḥnta-den-däḡ tasəḡbat n-išk wa jəm ed, a-wa ənnän əlkəttabän hək-däḡ a-wa dār-togdäh tärna n-Mässinäḡ, wär t-illa a däḡ-s təfhamäm.

25 Ašäl wa dd-nakkärän inəmmuttan, meddən hək tidəḡen, ad-äbas tidubunän ed ad-taläh tämudre-näsän d-ta n-änjälösän wi hənən išənnawän.

26 Ämära, däḡ-isälan wi n-inəmmuttan d-tanäkra-näsän, ajän wär täḡrem däḡ-əlkəttab wa n-ännäbi Mosa a-wa has-innä Mässinäḡ ḡur-tabsäḡt ta tähjäljälät wär räḡḡ? Wädden, inn'-as Mässinäḡ: <Näkk a-s Mässinäḡ n-Ibrahim d-İsaḡḡ d-Yaqub.>

27 A-wen, älmäḡna-net a-s, äddinät-win-däḡ, han älžännät, tiimələn Mässinäḡ; ənnär wär-ədderän, wär təjjən a-wen. Mässinäḡ, wädden inəmmuttan a-s ämoos Mässinäḡ, ämoos-t i-wi əddärnen. Tidət-däḡ a-s toškam ed tənnäm wär təlkem tanäkra jer-inəmmuttan.»

*Alämär wa ufän
(Mätti 22:34-40)*

28 Ohäz-dd iyyän däḡ-älyulam n-Ättäwrät äsijädän i-edäwänne wa ija ʿİsa d-käl-sadus d-

älwižab wa ähuusken hasän-ija, inn'-as: «Ma ämoos ħur-Mässinäx alämär wa ojärän?»

²⁹ Inn'-as Yisa: «Ënta da wa ojärän:

‹Ya Işrayil, səjəd!

Emäli-nänäx Mässinäx, ənta ħas a-s Emäli.

³⁰ Ad-tärhəd Emäli-näk Mässinäx s-ulh-näk imda tärhəd-t s-iman-näk əmdan, d-tayətte-näk təmda d-äşşahät-näk iket-net.›

³¹ Wa s-əssin dağ da:

‹Ad-tärhəd ənharäj-näk s-əmmək wa s-tərhed iman-näk.›

Wär t-illa alämär ojärän-win-däx.»

³² Inn' älħalim n-Ätṭäwrät i-Yisa: «Älħalim, tənned tidət:

Mässinäx iyyän, wär t-illa ar ənta.

³³ Iwar ägg-adəm ad-t-ärh s-ulh-net imda, d-tayətte-net təmda d-äşşahät-net iket-net; ärh dağ ənharäj-net s-əmmək wa s-irh' iman-net.

A-wen, wär t-təlla tasəbdärt wäla takute wär-ojer.»

³⁴ Inhäy Yisa iqqud n-älwižab-net ħas, inn'-as: «Käyy, äbas tujəjad Təmmənəya n-Mässinäx.» Äbas t-illa ḍarät-a-wen ere ihälän asəstan-net.

*Yisa, ojär tumast n-ahäya n-Dawəd
(Mätti 22:41-46; Luqa 20:41-44)*

³⁵ Isayra Yisa däx-ehän n-ämudd wa mäqqärän, ijanna i-äddinät: «Ma isawännen älħulam n-Ätṭäwrät a-s Älmasex, rure-s n-Dawəd?

³⁶ Wädden Dawəd iman-net a innän s-mäjräd ija Unfas Šäddijän däx-emm-net a-s: ‹Emäli Mässinäx, innä i-Emäli-nin,

əyyäw, xayəm daw-axil-in,
hundäx har äjəx išənja-näk daw-iðarän-näk.»

³⁷ Yas šamad Dawəd iman-net iɣarr Älmasex s-isəm Emäli; əndek əmmək wa s-äddoobät ad-umas rure-s?»

Ijräz mäjräd-wen-däx ija Yisa i-tamətte ta täjjeet has-täsijädät.

Hewät!

(Mätti 23:1-36; Luqa 11:37-54; 20:45-47)

³⁸ Däx-a-wa isəxra, inn'-asän: «Agəzät iman-näwän däx-älɣulam n-Ättäwrät, əjraznät-asän timukal däx-isəlsa əhobätnen, ijrəz-asän ad-hasän-titwəjjin isofan däx-tišarriten,

³⁹ ärhan tisəqqima-ti ännufläynen däx-ihənan n-äddin wi n-käl-Älyəhud d-atwəsəmyar däx-imjora,

⁴⁰ tihəxän a-wa ihän ifassän n-tinuðäfen, a-s ija a-wen, härkuk tumadän i-ad-tän-in-əjrähän äddinät; ilkam däx-sän äššərəxa səmmän.»

Tänuðäft ta tojərät imärrəzəxän ihuk

(Luqa 21:1-4)

⁴¹ Äqqiima Yisa däx-ehän n-ämudd wa mäqqärän dat-əssəndoqq wa däx-titwəjjinät tikutawen, ikyad däx-əmmək wa s-däx-s säns tamətte əzrəf. Təjjarän däx-s käl-ehäre əzrəf äjjeen;

⁴² tosä-dd tänuðäft läqqəwät, tästärakkät däx-əssəndoqq sənātät tämmaten əbðanen.

⁴³ Iyrä-dd Yisa inəttulab-net s-iman-net, inn'-asän: «Äsidätteɣ-awän a-s tänuðäft-ta-däx n-taläqqe, tojər äddinät iket-näsän ihuk,

44 fäl-a-s iket-näsän, a-wa s-ässakäyän s-wär-ämḡatärän a əkfän, a-s ija a-wen ənta, a-wa tətṭäf i-tämudre-net iket-net a təkfa.»

13

Teräzže ta təlcamät dāḡ-ehän n-ämudd wa mäqqārän

(Mätti 24:1-2; Luqa 21:5-6)

¹ Izjār-dd Ƴisa ehän n-ämudd wa mäqqārän ḡas, inn'-as iyyän dāḡ-inəṭṭulab-net «Äḡalim, ənhəy ḡas tihun-ti-dāḡ ähuskätnen, tihusay n-ehän!»

² Inn'-as Ƴisa: «Wädden hannäyäd-t ehän-wa-dāḡ mäqqārän ähusken? Wär mad-dāḡ-s dd-täqqayəm tähunt tiyyät warät tamidit-net, ad-ättäytäḡ iket-dāḡ-net.»

Išmal n-täməddawt n-äddunya

(Mätti 24:3-35; Luqa 17:22-24; 21:7-24)

³ Äqqiima Ƴisa ḡarät-a-wen fäll-tadaḡt ta tässidwälät ihəskan wi n-əzzäytun, ikyad dāḡ-ehän n-ämudd wa mäqqārän, issəstän-t Bəṭrus d-Yaqub d-Exya d-Idris dāḡ-takše,

⁴ ənnän-as: «Läḡät-anäḡ əmme d-mad-äj a-wa s-tənned? Əkkəs-anäḡ dāḡ-tayḡärt n-išmal wi s-mad-nəlməd a-s sämdo n-härät iket-net, iwwäd-dd?»

⁵ Äwwežäb-asän Ƴisa, inn'-asän: «He kəwəneḡ, äjät ənniyät, wär kəwän-išäsket äwadəm,

⁶ ad-dd-asən äddinät äjjootnen fäll-isəm-in, änn hak iyyän dāḡ-sän: «Näkk a-s Älmasex», šiškən s-a-wen-dāḡ äddinät äjjootnen.

⁷ Ad-təsləm i-isālan n-imjārān d-māhewəl n-imjārān, wār tāxwelām ed ilzam ad-āj a-wen māšan, sāmdo n-āddunya ənta, wār-ija hārwa.

⁸ Ad-təknəs tawset tamidit-net, iknəs əddəwəl amidi-net, āj laḥ, iškəḍkəḍ ākall dəḡ-idāggan ājjootnen, sānto n-tāməddawt n-āddunya ḡas a-wa, olāh d-sānto n-tizḡurt n-tamāḍt jarrāwāt eḡāf-net.

⁹ Māšan, ājāt ənniyāt i-iman-nāwān: ad-hawān-aškən āddināt s-əlxəkum, əjən dəḡ-wān tiwit dəḡ-ihānan n-āddin wi n-kāl-Ālyāhud; səbdədān-kāwān dat-gəfārān d-imānokālān, dəḡ-āddimmāt n-isəm-in wa kāwān-iwarān; umas a-wen əssəbab fāl tāmoosām tjuhawen-in data-sān,

¹⁰ i-ad-əslənāt tiwsaten iket-dəḡ-nāsnaḥ i-isālan n-Ālənḡil təzzar.

¹¹ Afāl kāwān-āstārmāsān āddināt, wār tāšāwwašāt dəḡ-isālan n-a-wa mad-tənnəm, ājāt məjṛād wa kāwān-e-itwəkfən əssaḡāt-wen-dəḡ ed wādden kāwāneḍ a maden-āmməjṛād, Unfas Šaddijān a he-ijən dəḡ-imawān-nāwān a-wa s-lām s-tənnə-net.

¹² Išilan-en, ad-isəttārməs āwadəm āḡḡas i-ad-āmmāt kərəf, isəttārməs abba rure-s, ānnābdādān aratān d-imārawān-nāsān, əjən iman n-imārawān-nāsān;

¹³ ad-dār-wān akəḍān āddināt iket-nāsān, dəḡ-āddimmāt n-isəm-in wa kāwān-iwarān, māšan ere wa ihālān iman-net, ākoyād dəḡ-alkum-hahi har ašāl wa d-imda a-wen-dəḡ iket-net, ad-iḡləs.

Erk āzzāmanān wi dd-malənen

14 Afäl tönhäyäm änanbxas wa n-emökkärekäđ hār äqqima dāğ-edāgg wa s-wār-ila s-ad-dāğ-s äqqayəm, äwadəm wa iğarrän isālan-wi-dāğ, ijrāhet älmāğna-nāsän! Wi irmäs a-wen-dāğ əzzağän teje ta n-Älyāhudəyät, jawāđnet dāğ-azzal s-ašrut wa n-iđağän,

15 wa iwārän afälla n-ehän, wār dd-itəzəbbutet i-ad-iđkəl a has-ihan ammas n-ehän,

16 wa ihän išəkraš, wār dd-itäqqälet đara-s i-ad-iđkəl asälso-net.

17 Timəskay tiđeden-ti mad-ärməsän išilan-win-dāğ lanät ənniyät meğ siđudnät.

18 Ettārät dāğ-Mässināğ ad-wār-itəmzəyyit ajiwəđ-nāwän d-əzzāman wa n-tajrəst

19 ed išilan-en-dāğ, ad-äj älyizabät äsuksäđän s-ad-dd-ixlāk Mässināğ äddunya-dāğ, wār kälä ätiwānhäy šund ənta fäll-ārori n-äkall, ad-təmdəw äddunya dāğ, wār-ilkem ad-ija a dār-s olāhän.

20 Afäl wār-ifnez Emäli dāğ-täqqän n-tisnant ta hāt išilan-win-dāğ, wār-iğəlləs wäl' ägg-adəm iyyän ғas; mäšan, ad-išəkšəl Mässināğ täqqän n-tizzurt-ten-dāğ, dāğ-təssəba n-äddinät wi äsnāfrän i-əlğəllas.

21 Äzzāman-en, afäl hawän-inna äwadəm: <Ənhəywät-ak, Älmasex, ənta da!> meğ <Ənhəywät-ak, ənta den!> wār t-təflesäm.

22 Ad-dd-asən älmasexän n-bahu d-ännäbitän n-bahu, əjən ijitän äsuksäđnen d-tišušab, šiškən ənnär ämmukkän a-wen wälä äddinät wi äsnāfrän Mässināğ.

23 He kəwāneđ! Äjät ənniyät i-iman-nāwän, əkkasāğ-kəwän dāğ-tağđärt hārwa wār jen

härätän-win-däx.»

Uxəl n-Ÿisa Ąlmasex
(*Mätti 24:29-31; Luqa 21:25-28*)

²⁴ «Đarät tisanant ta madät-täj däx-išilan-win-däx,

<ad-əlsənät tihay täfukt,

iba təmölle n-ewär,

²⁵ ətrəkken-dd etran däx-išənnawän,

ənhəynəhəyän iməşsuha wi hənən išənnawän.»

²⁶ Ąlwäqq-wen-däx, ad-e-itwənhəy Ągg-əgg-adəm, imal-dd, inay tijäräken, təlcam-as tärna-net d-älxurmät-net.

²⁷ Dihen, ad-išəmmişəl ənjälosän-net, sədəwənd-dd sär-s däx-tisdas iket-näsnät e d t-illäm ere əsinäfrän Mässinäx däx-e-d t-təlläm tamdujt fäll-əröri n-äkall hakd-däx däx-išənnawän.»

Iji n-ənniyät
(*Mätti 24:32-36; Luqa 21:29-33*)

²⁸ «Səjrähät xas əmmək wa s-idaggäl aşar: wädden e-d t-tənhäyäm a-s dd-insär har lämmedän ifärketän-net, ad-tənnəm, os'-anəx ewelän.

²⁹ Emmək-wen-däx daş a-s afäl tənhäyäm härätän-win-däx s-hawän-ənnex har əqqälän iji, adiş əlmədät a-s Ągg-əgg-adəm, ohäz-dd uxəl-net, os'-iwän fäw.

³⁰ Ąsidätteş-awän a-s, wär-e takəy əzzurəyät-ta-däx wär jen härätän-win-däx s-hawän-ənnex iket-däx-näsän.

³¹ Ojär täräşxe ija ad-ib' išənnawän d-äkall, uhən ad-iba tənna-nin.

Ƴaymät täsidäwäm i-ass n-Ƴisa Ālmasex

³² Däx-isälan n-aşäl meƳ ässaƳät wa däx-mad-əjən härätän-win-däx, wär t-illa ere t-issanän; wär t-əssenän änjälosän wi hänen işənnawän wäla Ägg-ägg-adəm; Abba Ƴas, a t-issanän.

³³ He käwäned! Ƴaymät tokayäm ed wär təssenäm ässaƳät s-dd-e-ass.

Tangalt ta n-isuf wi itäjj Mässinäx

³⁴ A-wa madän-äj, oläh d-ähäləs iƳarrän asikəl. Ässawäd tekle Ƴas, issədmän ehän-net däx-inaxdimän-net; äsmätär hak iyyän däx-sän d-a-wa s-ila s-ad-t-äj. Inna i-wa iƳläfän emm-n-ehän, äqqaymet okay.

³⁵ A-wen-däx a fäl, Ƴaymät tokayäm ed, wär təssenäm ässaƳät s-dd-e-ass mässi-s n-ehän, alməz meƳ tişrayät n-ehäd meƳ äƳora meƳ tifawt.

³⁶ Üksadät ad-dd-ass wär jem fäll-a-wen, iƳdär-käwän-dd təttaşäm.

³⁷ A-wa hawän-janneƳ, janneƳ-t daƳ i-äddinät iket-näsän, Ƴaymät tokayäm.»

14

Anu n-taydärt wa kittəwän imänokalän i-Ƴisa (Mätti 26:1-5; Luqa 22:1-2; Exya 11:45-53)

¹ Äqqiimän-in əssin işilan i-ämudd wa n-Faşka-i däx-tamäksänät tijəlwen ti wär ha täzğa. Tattärän imänokalän n-käl-tikutawen əmmək s-əssäydärän Ƴisa, əjən iman-net mäšan,

² ənnän, wär-ufa ad-äj a-wen däx-aşäl wa n-ämudd, i-ad-wär təjj tamdərwayt däx-tamətte.

*Tamädt ta tössänçalät ađutän fäll-Ŷisa
(Mätti 26:6-13; Exya 12:1-8)*

³ Aşäl iyyän d-ämijarät Ŷisa i-Simyön wa s-käla t-ijrāw jəri izzäxän tadäbayt ta n-Bitanya, itamänsaw dihen-däx, a-s t-dd-tosa tamädt täwwayät butəl iknan däx-tähunt mällät, han ađutän lanen älqim wär-iqquer härät. Tosä-dd xas, tärza emm n-butəl wa täwway, ad-sänçal ađutän wi t-hänen fäll-eğäf n-Ŷisa.

⁴ Ənhäyän äddinät-wi dār-əniğäyma a-wen, wär hasän-ijrez, əhnäffen däx-iman-näsän, ad-jannen: «Mafäl baxxäsän ađutän-wi-däx,

⁵ wädden äddooben ad-hin-ənsən kərədät timäđ n-ərriyal n-azrəf əmoosnen takute i-tiläqqiwen.» Ođänän ya ađkär i-tamädt-ten-däx.

⁶ Inn'-asän Ŷisa: «Äkfät-tät älğafyät, mafäl has-naxxäsäm iman? Tihusay n-härät tøj'-ahi-t!

⁷ Tiläqqiwen ya, əllanät ğur-wän härkuk, älwäqq s-tärhäm-däx, täddoobem ad-hasnät-tøjəm älxer məšan, nəkk, ilkam ad-käwän-äfläx.

⁸ Tamädt-i-däx, tēja a-wa täddoobät, təşşəswär-dd i-äddinät däx-isälan n-əmukən n-tafəkka-nin i-azəkka.

⁹ Äsidätteğ-awän a-s edägg däx-ätwäxtäbän isälan n-Älənžil, däx-äddunya-ta-däx, ad-däx-s ətwəsuxəlän isälan n-a-wa ja i-ad-tät-kittəwän äddinät.»

*Anu n-taydärt wa iyäş Yahudəs
(Mätti 26:14-16; Luqa 22:3-6)*

¹⁰ Inkär Yähudəs Isxaryut wa n-iyyän däx-inəttulab wi n-märaw d-əssin, ikk' imänokalän

n-käl-tikutawen i-ad-hasän-isäyđär Үisa, ärməšan-t.

¹¹ Äsdäwen-tän isälan wi dd-iwwäy, jän-as ärkäwäl n-ad-t-əkfen azrəf. Ad-itammäy Yähudəs ħur-älwäqq-wen-däy i-tašləlt s-hasän-t-ästärmäs.

Ämudd wa n-Faška

(Mätti 26:17-30; Luqa 22:7-23; Exya 13:21-30; 1 Kur: 11:23-25)

¹² Ašäl wa äzzarän n-ämudd däy-tamäksänät tijəlwen-ti wär təha täzza, älwäqq wa d-ħarräsän äddinät i-taḡsiwen ti n-Faška, ənnän inəttulab i-Үisa: «Əndek diha d-tärhed ad-nəsəssikəy imənsiwän n-ämudd wa n-Faška?»

¹³ Äsmašäl əssin däy-sän s-aḡrəm, inn'-asän: «Əjjəšät aḡrəm, ad-där-wän immuqqəs ähaləs äwwayän iddid n-aman, əlkəmät-as

¹⁴ s-ehän wa mad-ijjəš, tənnəm i-mässi-s n-ehän-en: <Inn'-ak älyalim, səkən-anäy edəgg däy-ehän-näk wa däy-mad-səssikəyäy ämudd wa n-Faška näkk d-inəttulab-in.>

¹⁵ Ad-käwän-isəkən soro n-ehän-net ih' ehän hərəwän, šäddiijän däy-ämmuujnen isəftaḡ, dihen-däy ad-mad-nəsəssikəy ämudd.»

¹⁶ Əglän inəttulab, əjjäšan aḡrəm, ənhäyän härätän s-əmmək-wa-däy s-hasän-tän-innä, ad-siməjnun imənsiwän wi n-Faška.

¹⁷ Ij' ehäd ħas, osä-dd Үisa äddeew d-inəttulab-net wi n-märaw d-əssin.

¹⁸ Tamänsawän dihen-däy a-s hasän-inna: «Äsidätteḡ-awän a-s iyyän däy-wän dər-i oharän ämära-däy a hi-madän-isəssäyđär.»

19 Ëkmän-tän iman-näsän a-s hasän-innä a-wen-däx, ad-has-jannen s-iyyän-iyyän: «Ajän näkk?»

20 Inn'-asän: «Ënneç: iyyän däx-wän dār-i ānimājjan āfuss däx-ākoss a hi-madān-isəssāydār.

21 Tidət-däx a-s Ägg-ägg-adəm, ad-t-iba, ed a-wen-däx a ənnän əlkəttabän n-Mässināx däx-isālan-net māšan, amāskoy āwadəm wa t-madān-isəssāydār! Āwadəm-en, iššām-as-in ad-wār dd-ijješ äddunya fāw.»

Asəbdad tasäktot ta šäddijät

22 Tattän dihen-däx a-s idkäl Yisa tajəlla, ämmoy i-Mässināx təzzar, äzun-asän-tät, inn'-asän: «Uhənät, a-wa taçəssa-nin.»

23 Idkäl çarät-a-wen kara han aman n-läxnäb, äxxiimmärnen, ämmoy i-Mässināx təzzar, ikf'-asän-t iket-däx-näsän, əswän däx-s.

24 Inn'-asän: «A-wa ašni-nin wa ämoošän ärkäwäl n-tassayt ta täynayät d-Mässināx, ašni-nin, ad-inçəl däx-təssəba n-äddinät äjjootnen.

25 Äsidätteç-awän a-s äbas ilkam ad-əswəç a dd-ijmaçän ara n-läxnäb hundäx har ašäl wa d-mad-äswäç wa äynayän däx-Təmmənəya n-Mässināx.»

26 Äwwäy Yisa d-inəttulab-net isuhay n-təmmal n-Mässināx dd-əzjarnen əlkəttab wa n-Äzzäbur, əglän çarät-a-wen, əkkän taçayt ta tässidwälät ihəškan wi n-əzzäytun.

Ilkam ad-ikkuddəl Bəçrus Yisa

(Mätti 26:31-35; Luqa 22:31-34; Exya 13:36-38)

²⁷ Inn'-asän darät-a-wen: «Ad-täqqöläm dar'-i iket-däx-nawän ed iktab däx-əlkəttab n-Mässinäx a-s:

«Ad-əwətäy amədan, iba-t, ämmähašnät tihatten iket-näsnät.»

²⁸ Afäl dd-ənkäräx jer-inəmmuttan, ad-hawän-izaräx s-teje ta n-Galila.»

²⁹ Iggäd-dd Bətrus, inn'-as: «Kud-irha əkkuddəlän-käy imidiwän-in iket-näsän, näkk iman-in, wär käy-mad-əkkuddələx.»

³⁰ Inn'-as Yisa: «Äsidättey-ak a-s ehäd-i-däx, a-s-e-äj eköz əssin iḡoran, täkkuddäläd-ahi har kərəd ihändəgən.»

³¹ Ibbäräd Bətrus, innä dəx: «Näkk ḡas, kud-däx tamättant a tihräx dār-k, wär käy-mad-əkkuddələx.» Abəraj-wen-däx ija Bətrus, a jän imidiwän-net.

Ässaḡät wa ikkäs Yisa dəx-ašəkrəš wa n-Žätsämmani
(Mätti 26:36-46; Luqa 22:39-46)

³² Äddew dār-sän Yisa darät-a-wen s-ašəkrəš iyyän iknan asədwal n-ihəškan s-isəm-net Žätsämmani. Ewwädän-in ḡas, inn'-asän: «ḡaymät, täqqöläm-ahi diha-däx har ədələx Mässinäx.»

³³ Iššənkäš-in fälla-sän, äddeew d-Bətrus d-Yaqub d-Exya; ḡur-ässaḡät-wen-däx ad-t-əssəntän iman-net təkma, ixwäl.

³⁴ Inn'-asän: «Äryan iman-in, äryan har išwar hi-äba; wär tətḡesäm, ḡaymät ḡur-i, wär hanäḡ-iläqqädət eḡəs.»

³⁵ Iššenkäš-in daḡ fälla-sän a ɛndärrän, irkäḡ, ad-itəddal Mässinäḡ, ijanna: «Kunta ämmuukkän a-wen-däḡ, ajet-ahi ässaḡät-i-däḡ.»

³⁶ Innä daḡ däḡ-tittar-net: «Abba-nin, wär t-illa a-s wädden täddoobed-t, səssijəj-ahi tissant-ta-däḡ, mäšan hakd a-wen-däḡ, ajet erhet wa-näk wädden wa-nin.»

³⁷ Iqqäl-tän-dd Ȳisa, ogäz-tän-dd ɛtṭasän, issenkär Bəṭrus, inn'-as: «Simyon, käyy tətṭasäd? Adiš, indär-ak wäla-däḡ ad-təjəd ässaḡät iyyän tokayäd,

³⁸ äyyät fälla-wän eḡes, ɛdälät Mässinäḡ i-ad-käwän-agəz däḡ-tändärbaten n-Iblis; ägg-adəm, tidət-däḡ a-s äsidärhän amišəl n-a äjjeen ähuusken mäšan, igdal-as iba n-äṣṣahät n-tumast-net amišəl n-a-wa irha.»

³⁹ Oläs daḡ ašenkəš fälla-sän, ad-itəddal Mässinäḡ s-əmmək-wənnin-däḡ s-t-idäl s-tizarät.

⁴⁰ Oläs-tän-dd uḡəl, ogäz-tän-dd, ij'-asän eḡes aläḡad wa-däḡ fäl hasän-indär wäla ad-arən tiṭṭawen-näsän; issenkär-tän mäšan, äba-hasän a hasän-ənnän a-wa-däḡ hasän-ija, äzuk n-eḡes.

⁴¹ Ifäl-tän, ij'-asän-dd uḡəl wa s-käraḡ, inn'-asän: «Ȳas käwänəḡ tətṭasäm, sinfum härwa? Igdäh-awän; ässaḡät wa d-itiṭwäḡdir Ägg-ägg-adəm, ijješ ifassän n-inäsbäkkadän, osä-dd.

⁴² Īnkärät, äglät-anäḡ, os'-iwän ämaḡdar-in.»

Atärməs n-Ȳisa

(Mätti 26:47-56; Luqa 22:47-53; Exya 18:2-11)

⁴³ Ämmiijräd härwa a-s dd-osa Ȳähudəs, iyyän däḡ-inəṭṭulab-net wi n-märaw d-əssin,

äsiläl tamötte s-iyyəđ, öşläjān tikobawen, iyyäđ äwwayān iboriyān; äšimašälān-tān imānokālān n-kāl-tikutawen d-älyulam n-Ättāwrät d-inušāmān n-Işrayil.

⁴⁴ Tamötte-ten-däx, ij'-as Yāhudəs wa n-ämāydar tamätart däx-has-inna: «Ähaləs wa s-hi-tənhäyām har t-osäsäx däx-idmarān-in, ənta a-s Ÿisa, ärməsät-t, təgləm dār-s däx-a-s has-təknam iji n-ənniyät.»

⁴⁵ Osä-dd Yāhudəs, oğād iman-net s-Ÿisa, inn'-as: «Älfäqqi!» Osäs-t däx-idmarān-net.

⁴⁶ Tođa tamötte fäll-Ÿisa, tärmäs-t.

⁴⁷ Iggäd-dd iyyān däx-inəttulab-net, ilbäy-dd tākoba-net, iwät sār-s akli n-ämānokāl n-kāl-tikutawen, ištāf-dd sār-s taməzzujt-net.

⁴⁸ Inna Ÿisa i-tamötte: «Ajān näkk ānaɣtaf a ämoosäx a-s hi-dd-takkām d-tikobawen d-iboriyān i-ad-hi-tärməsām?»

⁴⁹ Wädden hak ašäl əllex-t jere-wān, saɣreɣ däx-ehān n-ämudd wa mäqqārān, mafāl wār hi däx-s tärməsām? Elmədät a-s a-wa ijān ašäl-i-däx, ija i-ad-itbət a-wa ənnān əlkəttabān n-Mässinäx däx-isālan-in.»

⁵⁰ Äjewäđän inəttulab iket-näsān, oyyān-dd Ÿisa ənta ɣas jer-işənja-net.

Ämawađ wa äjewäđän

⁵¹ İlkām-as-dd ämawađ iyyān wārān ilsa ar tasəjbəst lämməđät daw-wār t-illa hārät, äkbätten-t-dd äddinät ɣas,

⁵² oyy'-asān-in tasəjbəst-net, ošäl wār ilsa tikəst.

*Tebädde n-ÿisa dat-äššärexa wa mäqqārān
(Mätti 26:57-68; Luqa 22:54-55, 63-71; Exya
18:12-14, 19-24)*

⁵³ Ittəlwäy ÿisa s-ämānokāl n-kāl-tikutawen-
i s-a-s itäjǰ a-wen-däx, äžžimmäxān xur-s käl-
tikutawen d-inušāmān n-Işrayil d-älxulam n-
Ättāwrat.

⁵⁴ Tamətte-en, ij'-as-dd Bətrus alkum šejren
har təjjāš ammas n-äxalla n-ehān n-ämānokāl
n-kāl-tikutawen; osä-dd Bətrus, ijǰāš ənta-däx,
iglä äqqima edes i-gärditān, ad-itazzāh s-efew.

⁵⁵ A-s itäjǰ a-wen-däx, tattārān imānokālān
n-kāl-tikutawen d-kāl-Sinhidrin-i† tirənen
äššärexa ere innān bahu fäll-ÿisa, siḏəwən-t
däx-äššärexa, äxtəsān-as tamättant māšan, wār
t-illa uḏlem fälla-s əjrawān.

⁵⁶ Eggādān-dd äddināt äjjootnen, ad-t-
sadlamān māšan, indār-asān ad-ännāfhāmān
fäll-bahutān-nāsān.

⁵⁷ Sawarān-t iyyād bahu,

⁵⁸ jannen: «nəsall'-as a-s innā: «Näkk, ad-
ärzäx ehān n-ämudd wa mäqqārān dāyān
ifassān n-dägg-adəm, səbdədäx-dd däx-käraḏ
išilan i wār deyān ifassān n-ägg-adəm däx-
edägg-net» »

⁵⁹ māšan, wāla bahu-wen-däx, indār-asān ad-
fälla-s ännāfhāmān.

⁶⁰ Ihā-dd ämānokāl n-kāl-tikutawen ibdad
däx-ammas n-älžāmaxāt, innā i-ÿisa: «Ma
tənned däx-a-wa fälla-k itawānnen? Mäjrād!»

† 14:55 14:55 A-wa älzāmaxāt n-inušāmān d-imizārān
n-kāl-Işrayil wa itirən äššärexa, əntāneḏ a-s älcəllitān, osaxān
dax tamətte d-əlxəkum d-äddin.

61 Wār t-illa a has-inna Ȳisa. Issəstän-t ämänokal n-käl-tikutawen daḡ, inn'-as: «Ajän käyy a-s Älmaseḡ wa n-Rure-s n-Wa ibbəlälän.»

62 Inn'-as Ȳisa: «Ämoosäḡ-t; ässiilmädäḡ-käy daḡ a-s ḡur-ašäl-i-däḡ, ad-tənhəyäm Ägg-ägg-adəm, äqqiima daw-aḡil n-Wa ilän tärna iket-net, taləsəm-t daḡ ahänay, iqqal-dd, ifal-dd išənnawän, inay tijäräken.»

63 Isl' ämänokal n-käl-tikutawen i-a-wen ḡas, ijjäš-t älhäm wa-däḡ fäl irmäs err n-eräs-wäy-net, äšḡarrawät-t fäll-iman-net, inna: «Ma nətajj i-tijuhawen daḡ?

64 Təsläm-as iket-näwän a-s äskafär wädden; ma tənnäm däḡ-isälan-net?» Äswärän-t udlem iket-näsän, ənnän änihäjjä d-tamättant.

65 Ad-fälla-s situfän, salsen ekäršäy idəm-net, sattäḡän-as, jannen-as: «Luləy ya!» Sattäḡän-as daḡ ḡärditän.

Akuddəl n-Bəḡrus i-Ȳisa

(Mätti 26:69-75; Luqa 22:56-62; Exya 18:15-18, 25-27)

66 Äqqiima Bəḡrus däḡ-ammäs n-äḡalla-en-däḡ a-s t-dd tosa tiyyät däḡ-tinaxdimen n-ämänokal n-käl-tikutawen;

67 tənhäy-t izzah s-efew, täzjəzz'-e, tənn'-as: «Käyy-däḡ, käla täddewäd d-Ȳisa wa n-Näsirät?»

68 Äkkuddäl Bəḡrus a-wen, inn'-as: «Wär-əjrehäḡ, wär-əssenäḡ a däḡ-hi-tässewäläd.» Izjār Bəḡrus darät-a-wen, ikk' emm n-äḡalla ḡas, iwät ekäz äḡora.

69 Tənhäy-t daḡ tənaxdimt tiyyät, ad-janna i-äddinät-wi t-əllanen dihen: «Hannäyäm-t ähaləs-wa-däḡ, iyyän däḡ-sän.»

70 Oläs daḡ Bəṭrus akuddəl n-a-wen. A əndärrän darät-a-wen, ənnän-as äddinät əbdadnen dihen: «Ijmad-t äššäk a-s iyyän däḡ-sän a tämoosäd ed käyy-däḡ, Galila a käy-lät.»

71 Ad-hasän-itähhad, ilaqqän iman-net siha d-siha, ijann'-asän: «Ähaləs wa s-hi-jännem, wär t-əzzeyäḡ.»

72 Diha-däḡ d-innä a-wen-däḡ ad-iwät ekäz äḡora wa s-əssin. Iktä-dd Bəṭrus məjrad wa s-käla has-t-ija Ḳisa a-s has-innä: «Wär mad-iwət ekäz əssin iḡoran wär tənneḡ har kərəḡ ihändäggan, wär hi-təzzeyäd.» Izjār, ad-ihall.

15

Tebädde n-Ḳisa dat-Bilatəs

(Mätti 27:1-2, 11-14; Luqa 23:1-5; Exya 18:28-38)

¹ Härwa emäḡār ad-änmänhäyän käl-tikutawen d-inušämän n-Işrayil d-älḡulam n-Ättäwrät d-käl-Sinhidrin-i† tirənen äššäreḡa; jän tişəm däḡ-Ḳisa təzzar, əlwäyän-t s-Bilatəs.

² Inhäy-t Bilatəs ḡas, issəstän-t, inn'-as: «Ak, käyy a-s ämänokal n-käl-Älyähud meḡ?» Inn'-as Ḳisa: «Käyy iman-näk, tənneḡ-tän.»

³ Ad-t-sawarän uḡlemän äjjootnen.

† 15:1 15:1 A-wa älzäməḡät n-inušämän d-imizärän n-käl-Işrayil wa itirən äššäreḡa, əntäneḡ a-s älqallitän, oşaḡän daḡ tamətte d-əlxəkum d-äddin.

⁴ Issəstän-t Bilatəs daḡ, inn'-as: «Ənhəy ɣas a-wa fälla-k itawännən? Ma tənneḡ kəyy iman-nək?»

⁵ Wār t-illa a has-inna Ƴisa har iqqān asusəmet eḡaf n-Bilatəs.

Bəryəbbas wa n-eməjj n-iman

(Matti 15:31; Luqa 23:13-15; Exya 18:38-19:36)

⁶ Äzzāman-en, hak əmudd n-Faška, əsiwəyy'-in gəfār u-takärmüt wa dəḡ-s tətətar tamətte.

⁷ A-s itəjj a-wen, ih' əhaləs s-isəmet Bəryəbbas takärmüt ənta d-imidiwän-net s-kāla dd-əssənkārən tamətte har jän iman n-əwadəm dəḡ-a-wen-dəḡ.

⁸ Tənkär tamətte iket-net ad-tattar dəḡ-Bilatəs a-wa s-izzəy ad-hasən-t-əj.

⁹ Inn'-asən: «Ak ajän tərham ad-hawän-in-əyyəḡ əmənokal n-käl-Əlyəhud?»

¹⁰ Issan Bilatəs a-s təmyäre n-tismiten n-imənokalən n-käl-tikutawen a fäl əstərməsən Ƴisa.

¹¹ Əntəjən-dd tamətte s-Bilatəs i-ad-hasən-dd-isəwwəyy Bəryəbbas.

¹² Oləs daḡ Bilatəs, inn'-asən: «Ma s-tərham ad-t-əjəḡ i-wa s-itawänna əmənokal n-käl-Əlyəhud?»

¹³ Oləsən eḡəri, jannen: «Itwəşləbet fäll-tajəttewt.»

¹⁴ Inn'-asən Bilatəs: «Mafäl, ma iyşad t-əsiinəhəjjän d-taməttant?» Əşḡəyyän dəḡ-işənnawän: «Itwəşləbet fäll-tajəttewt.»

15 Ässof Bilatəs alkum i-erhet-näsän, äswäyy'-asän-in Bärğäbbas, äswäjjä tiwit s-ebärtäk däg-Ûisa təzzar, ikf'-asän-t i-ad-itwäşləb.

*Asəmmädri wa jän əssärdusa i-Ûisa
(Mätti 27:27-31; Exya 19:2-3)*

16 Elwäyän əssärdusa wi n-gəfär Ûisa s-ammäs n-ehän wa däg-iğattäs äşşäreğä, iğläyğäläy-t-dd dihen ejhän n-əssärdusa imdan,

17 əssəlsän-t anəkäbba šaggäğän, jän-as älmät, korona, a-wen, takənbut šund ta n-imänokalän, təzat däg-isənnanän,

18 ad-has-tajjän isofan, jannen-as: «Ämänokal n-käl-Älyähud, nəj'-ak gärdəbu.»

19 Hakkän-t tiwit s-täborit fäll-eğäf, situfän fälla-s, rakkäğän data-s, älmät çabbädän-t.

20 Əssəgdähän däg-tekäşkäšt ta tän-təşlät ças, əkkäsän-dd fälla-s anəkabba-wənnin šaggäğän, əsoğälän-as isəlsa-net təzzar, əzjārän dār-s ağrəm s-edägg wa-däg ila s-ad-däg-s itwəşləb fäll-tajəttewt.

Atwəşləb n-Ûisa

(Mätti 27:32-44; Luqa 23:26-43; Exya 19:17-27)

21 Eglan dār-s a-s ämmoqqäsän d-Simyön wa n-tadäbayt ta n-Qərwan n-abba n-Älxadəer d-Rəffus, ifal-dd išəkraš; äşhäşşälän-t alənji n-tajəttewt ta fäll-mad-itwəşləb Ûisa.

22 Äwwäyän Ûisa s-edägg wa s-itawänna Gälgota, a-wen, älmäğna-net: «Edägg wa n-akärkor.»

23 Əssärtäyän-as-dd dihen asməd d-asäfar iyyän ifannäzän tissant dəx-taxəssa n-äwadəm mäšan, unjäy isw'-e.

24 Əsläbän-t əssärdusa fäll-tajəttewt xas, jän tisäxeren i-ad-užanän isəlsa-net jer-iman-näsän, əlmədän əndek a-wa he-ikrəş hak iyyän dəx-sän.

25 Agdəlset a-s t-əsläbän fäll-tajəttewt, xur-ässaxät wa s-təzə.

26 Əttəytäyän ällox jənnəj-s i-ad-əlmədän äddinät äddälil wa sār-s dd-oräwän tamättant; ällox-en, iktab fälla-s:

«A-WA ÄMÄNOKAL N-KÄL-ÄLYÄHUD».

27 Aşäl-en, ämizäyyen əssin inaxtafän atwəşləb d-Ÿisa; ätwäşläb iyyän daw-axil-net, ätwäşläb wa iyyädän daw-täşälje-net.

28 A-wen-dəx jän i-Ÿisa a-s ənnän əlkəttabän n-Mässinäx ad-äj fäl-a-s, iktab a-s:
«Ad-ıdan dəx-iməddəxwa.»

29 Iqqäl Ÿisa tekäşkäşt i-äddinät-wi tikəynen, gaggärän-t, siwliwilän ixäfawän-näsän, jannen-as: «Hyjaa, käyy wädden tənned täddobed teräzze n-ehän n-ämudd wa mäqqärän, taləsäd-t edey dəx-kärađ işilan,

30 əxləs ya iman-näk ämära, təzzəbbud-dd tajəttewt!»

31 Jän-t day imänokalän n-käl-tikutawen d-älxulam n-Ättäwrät tekäşkäşt, tinmənnin: «Ənta-i ixläsän äddinät wi iyyädnen, indar-as ämära ad-ixləs iman-net.

32 Kunta ənta a-s Älmasex wa n-ämänokal n-Işrayil, izzubbətet-dd tajəttewt, ad-t-nənhəy, namən sār-s.» Jän-t wi ätwäşläbnen edes-has tekäşkäşt, ad-t-gaggärän əntäneđ-dəx.

*Iba n-Ŷisa**(Mätti 27:45-56; Luqa 23:44-49; Exya 19:28-30)*

³³ Elsänät tihay ärori n-äkall iket-däx-net wa-däx n-tarähut hundäx har tezzar.

³⁴ Təja tezzar ɣas, äşärät Ŷisa s-äşşahät, innä:

«Yällöy, Yällöy,

lama säbäxtani?»

A-wen älmäɣna-net:

«Mässi-ɣ Mässinäx, Mässi-ɣ Mässinäx,

mafäl hi-tiyyəd d-iman-in

däx-tisnant-ta-däx?»

³⁵ Əslän-as äddinät əbdadnen dihen, wär-əfhemän a-wa ijänna ɣas, ad-jannen: «Säjdät-as, ännäbi Ŷəli a iɣarr.»

³⁶ Oşäl-dd sär-s iyyän däx-sän, issəlmäx täduft tətälät fäll-äbori däx-bənegär, izzäl-as-tät i-ad-tät-isuməm, infəw-t a-wen däx-fad, ihakk-as-tät dihen-däx, ijanna: «Ad-nənhəy ya kunta ad-t-dd-ass ännäbi Ŷəli, izəzzubbət-t-dd tajəttewt.»

³⁷ Äşärät Ŷisa s-äşşahät ɗarät-a-wen, əjmädän-t iman.

³⁸ Iqqärrawät älwäqq-wen-däx ärido wa ibdän däx-ehän n-ämudd wa mäqqärän, edägg wa şaddijän d-edägg wa iknän təşədje däx-ammäs, wa-däx n-afälla-net har ider-net.

³⁹ Inhäy kəbtän iyyän iswaɗän däx-Ŷisa a-s t-ijmäd unfas a-wen ɣas, innä: «Tidət-däx a-s ähaləs-i-däx, Rure-s n-Mässinäx.»

⁴⁰ Əbdadnät daɣ dihen tiɗeden tiyyäd däx-ijəj, əkyadnät däx-a-wa ijän. Tiɗeden-en, h'-enät

Märyäma ta n-Muläždalöyät, Märyäma ta n-ma-s n-Yaqub wa əndärrän d-Yusəf d-tiyyät s-isəmet Sälma.

⁴¹ Əntänätəd-en-däx ad-dd-äddewnen d-Ÿisa, wa-däx n-Galila, ədhalnät-t s-a-wa ətṭäfnät har əntänätəd-da-däx; əbdadnät dax edes-hasnät tiyyäd äjjootnen dd-äddeewnen d-Ÿisa a-s dd-ikka Yärussälam.

Azəkka n-Ÿisa

(Mätti 27:57-61; Luqa 23:50-56; Exya 19:38-42)

⁴² Tokäy takkäşt n-aşäl wa n-əlžəmöt, sadaw tamötte i-aşäl wa n-əssəbət-i n-täsonfat,

⁴³ osä-dd Yusəf wa n-Arimata, ähaləs ätiwäsämḡärän däx-inušämän n-Işrayil, ijar ätṭäma n-a-s təlcam Təmmənəya n-Mässinäx. Ənta-en-däx a ihälän tikawt n-Bilatəs, ittär däx-s tafəkka n-Ÿisa.

⁴⁴ Tofa təkunt n-armuḡ n-tamättant n-Ÿisa Bilatəs, issäḡrə-dd kəbtän iyyän i-ad-t-isəstən d-a-s tädduuttät tamättant-net meḡ?

⁴⁵ Ijä däx-s kəbtän-en isälan n-a-s äba-t ḡas, issärräx-as aḡkul n-tafəkka-net.

⁴⁶ Iglä Yusəf, ižžənsä-dd tefit, ikkäs-dd tafəkka n-Ÿisa fäll-tajəttewt, ij'-et däx-tefit təzzar, issəns'-et däx-azəkka iḡaşän däx-esəwäl; äşḡäränḡarät ḡarät-a-wen təhunt məqqoorät, ätṭubbät sār-s emm n-azəkka.

⁴⁷ Təjjəyha Märyäma ta n-Muläždalöyät d-Märyäma ta n-ma-s n-Yusəf i-a-wen-däx iket-net, əknänät asəbbuyən n-edägg wa däx-izka Ÿisa təzzar, əglänät.

16

Tanäkra n-ÿisa jer-inəmmuttan (Mätti 28:1-10; Luqa 24:1-12; Exya 20:1-10)

¹ Okäy əssəbət-i n-aşäl wa n-täsonfat ƣas, təžžənşä-dd Märyäma ta n-Muläždaləyät d-Märyäma ta n-ma-s n-Yaqub d-Sälma əlxənfärän i-ad-əşwəynät sär-sän tafəkka n-ÿisa.

² Tifawt n-älxad-i n-aşäl wa äzzarän dəƣ-əssəboƣ, ƣur-ajmuđ n-täfukt, əkkänät azəkka.

³ Əglanät, tinmənninät jer-iman-näsnät: «Näkkänätəđ-i-däƣ, mi hanäƣ-e-ikkəsən təhunt ta məqqärät təhärät emm n-azəkka?»

⁴ Əwwädnät-in ƣas, əkyädnät, ənhäynät a-s təhunt-tənnin məqqärät, təyiraräd-in.

⁵ Əjjäšnät ammas n-azəkka, ənhäynät ämawađ ilsan emäls mällän, äqqiima daw-aƣil-näsnät, tərtäy-asnät tarəmməxt d-täqqän n-eƣäf.

⁶ Mäšan, inn'-asnät ämawađ: «Wär täqqännet iƣäfawän-näkmät, wär tärmeƣmät, ÿisa wa n-Näşirät ätwäşläbän s-tammäƣmät, inkär-dd jer-inəmmuttan, äbas t-illa diha; ənhəymät edägg wa s-käla dəƣ-s insa.

⁷ Ämära, äkkəmät inəmmušal d-Bətrus, tənnəmät-as a-s äzzar-awän iket-näwän s-Galila, dihen-däƣ ad-mad-t-tənhəyäm s-əmmək wa-däƣ s-käla hawän-tän-inna.»

⁸ Əzjärnät-dd azəkka ƣas, oşäl-nät, təşişäkädkäđ-tänät tarəmməxt tərtayät d-täqqän n-eƣäf. Wär t-illa ere s-ənnanät härät a-wa-däƣ hasnät-ja tarəmməxt.

Anfiləl wa dd-ija Yisa i-Märyäma ta n-Muläzđaləyät

(Mätti 28:16-20; Luqa 24:13-49; Exya 20:11-23)

[
⁹ Ašäl wa n-älxad-i n-ašäl wa äzzarän dăḡ-əssəboḡ ad-dd-inkär Yisa jer-inəmmuttan. Änfaläl-dd s-tizarät i-Märyäma ta n-Muläzđaləyät-i dăḡ-ikkäs əssa alšinän,

¹⁰ təglä, təj'-isälan dăḡ-äddinät wi s-käla äddewän d-Yisa-i s-a-s itäj a-wen, eṭṭafän ibanet, äsniinän.

¹¹ Eslän a-s tənhay-t iddar mäšan, unjäyän sad-tät-əfləsän.

Anfiləl n-Yisa i-əssin dăḡ-inalkimän-net

(Luqa 24:13-35)

¹² Issəkna Yisa iman-net đarät-a-wen i-əssin dăḡ-inalkimän-net əkkanen ejef. Änfaläl-asän-dd dăḡ-ini säl wənnin-dăḡ dd-änfaläl i-Märyäma.

¹³ Eqqälän Yärussälam, jän isälan dăḡ-imidiwän-näsän wi iyyädnen mäšan, wär tän-əfləsän əntäneđ-dăḡ.

Ämašal wa issäyläf Yisa inəṭṭulab-net

(Mätti 28:16-20; Luqa 24:36-49; Exya 20:19-23)

¹⁴ Änfaläl-dd Yisa đarät-a-wen i-inəṭṭulab wi n-märaw d-iyän dăḡ-älwäqq d-äžziimmäḡän, tamänsawän. Äkläwläw fälla-sän dăḡ-təssəba n-iba immun-näsän d-təḡart-ta jän ulhawän-näsän fäl-a-s, unjäyän əfləsän äddinät wi t-ənhäyenen, inkar-dd jer-inəmmuttan.

15 Inn'-asän: «Ämära, äglät, ilalät äddunya iket-net, täxtəbäm Älənžil i-e d t-illäm ägg-adəm.

16 Wa omänän, ätwäsälmaḡ dəḡ-aman, ad-iḡləs; wa äşḡärän ulh-net, ad-t-iwär udlem dat-Mässinäḡ.

17 Əntänəḡ-da hərätän wi mad-ämaşälän wi maden-amən: ad-əkkəsän alşinän dəḡ-äddinät s-tärna n-isəm-in, ad-ämmäjrädän awalän äynaynen,

18 ətṭəfän taşşälən dəḡ-ifassän-näsän, kud-əswän sunsəj-dəḡ, wär hasän-e-iḡşəd hərät, e-d äswärän ifassän-näsän imarhinän, ad-əzzəyän.»

Iqqäl Үisa išənnawän-i dd-ifäl

(Luqa 24:50-53)

19 Ij'-asän Үisa məjräd-wen-dəḡ ḡas, imməḡkäl s-işənnawän, igl' äqqima daw-aḡil n-Mässinäḡ.

20 Əglän inəṭṭulab ḡarät-a-wen, ad-xatṭäbän isälan dəḡ-idäḡḡan iket-näsän. Idhal-tän Emäli, isidəttut məjräd-näsän s-ijitän n-Mässinäḡ wi tamaşälän. Amin!]

**Ălənžil n-Ÿisa Ălmasex: Kitab Ălmuqăddăs
Tamasheq: New Testament**

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

b95f369b-a236-5ca8-8cab-11f74279d73c